


TATA MUKUDI

 Matondo na nge, Mpangi Neville. Mfumu sakumuna nge. Na yina mbote na kuvutuka diaka, na suka yayi, kuna na yinzo ya Mfumu. Mu banza ti ba tubaka yawu, kilumbu mosi, “Mu wandaka na kiese ntangu ba tubaka na munu, ‘Beto kwenda na yinzo ya Mfumu.’”

Charlie, kwisa na manima ya dikunzi yina, mpe kwisa awa mpe nge baka kiti. Mata awa. Mpangi-kento, ya kele na kiti na manima kuna, kisika mosi kuna, beto lenda kota? Awa kele na kisika kaka *awa*, mama. Kwisa awa. Tala, Charlie, kwisa awa mpe vwanda pene-pene ya Banks awa, na yina nge ke telema ve. Ntangu nionso mwana-bakala yina ke katukaka kuna na Kentucky, yandi ke kwisa awa, yandi ke telema, konso suka. Mpe beto ke nata yandi awa.

² Awa kele kisika awa, na nsuka ya kiti awa, samu na muntu yankaka. [Mpangi Neville me tuba, “Ya kele na mama mosi na manima awa, mpe.”—Mu.] Ya kele na mama mosi me telama na manima, na manima kuna. Kwisa awa. Awa kele na kiti kaka awa, mpangi-kento, kaka pene-pene. Kwisa kaka na ntwala. Mpe mu banza ti muntu mosi kele na fauteuil roulant kuna. Bawu kele? [Mpangi-kento mosi me tuba, “Mpangi Branham?”] Yinga. [“Ya kele na kiti kaka awa.”] Ya kele na kiti yankaka kaka *awa*. Kana muntu zola mosi, kuna na manima, kaka *awa* kele na kiti awa. [Mpangi mosi ya bakala me tuba, “Mpe awa kele mosi, Mpangi Branham.”] Ya kele na mosi kaka awa, mpe, beno vwanda kaka swi. [“Yankaka, awa.”] Yinga. Beno lenda kuzwa mosi kaka awa. Ntangu yayi, beno kwiza kaka, beno baka bakiti ya beno. Mpe beno ke kuwa kaka kieleka. . .

³ Beto zola ti beno vwanda mbote na yina beto ke meka na kulonga Ndinga ya Mfumu. Oh, ya kele kieleka mbote na kuvwanda awa.

⁴ Mu me mona ve Charlie na estrade. Yandi kele kuna na manima? Mbote, basisa yandi awa. Oh! Mu wandaka na Charlie, kuna, mwa bilumbu me luta, mpe mu lendaka ve kukwenda na yinzo ya yandi mpe kudia, na yina mu ke nata yandi mbala mosi na estrade, na suka yayi. Konso kilumbu yandi ke kwisa awa, yandi me telema pene-pene ya kibaka kuna, samu na kupesa muntu mosi kiti. Na yina mu talaka na suka yayi mpe mu monaka yandi ya kutelama kuna, mu banzaka, “Mu ke—mu ke kotisa yandi awa ntangu yayi.” Mbote, ya kele—ya kele mbote. Ntangu yayi beto ke kuzwa nsangu na suka yayi na nzila ya Mpangi Russell Cox. [Mpangi Branham mpe dibuundu me seka—Mu.] Wapi Nellie? Mu. . . Yina ke vwanda mbote samu na yandi. Wapi? Yinga. Yawu yina.

⁵ Mbote, ya kieleka mu ke na kiese na kumona bankundi mingi ya munu kuna na ngaanda. Na Lumingu me luta ntangu mu kwendaka, mu vwandaka na mpasi na sabala ya muvimba. Mu vwandaka na nkundi mosi ya mbote ya kuvwanda awa, yina katukaka kuna na Sud, Mpangi West. Mpe mu kwendaka kuna, na kati ya kivinga, na manima ya ntangu. Mu tubaka, “Mu kele na kyese na kumona *Kingandi* mpe *Kingandi*,” mpe mu talaka kaka na zulu ya Mpangi West, mpe ata mbala mosi ve—ata mbala mosi ve talaka yandi tii yandi bandaka na kukwenda. Na yina mu banzaka, sabala nyonso, “Mpangi West ke banza ti mu—mu ke tala kaka yandi.” Kasi yandi kele—yandi kele Muklisto, na yina yandi zaba ya kulutila yina. Yandi zaba ti mu . . . nkundi ya kieleka. Mpe mu zaba ti yandi zaba, mu ke sala yawu ve.

⁶ Mu vwandaka banza na suka yayi, na kukulumukaka, samu na kumona bantu yina katukaka na bisika yankaka. Ntangu yayi, awa kele Mpangi West dyaka awa, na suka yayi. Mpe Mpangi-bakala mpe Mpangi-kento Kidd awa, ya Ohio. Mpe bayankaka ya munu . . .

Mu zaba ti Mpangi Evans kele awa. Mu kwendaka mona yandi, mazono na manima ya midi, na motel, kasi mu banza ti yandi vwandaka na ngaanda na Mpangi Fred mpe bayankaka. Mpe bawu me katuka ntama na Macon, na Georgie, awa, konso Lumingu yina mu ke tuba. Na Macon, na Georgie, yina ke ntama mingi kuna. Ya ke pene ya ba-kilometre nkama nana, to kulutila mbote, mu banza, kuna. Kunata yawu na dibuta ya yandi, konso kilumbu mu ke tuba. Mpe yina kele ya kusungama.

⁷ Mpe mu vwandaka—vwandaka banza, oh, na yina, kana beno kele na bankundi mutindu yina, yina ke zola kutelama pene-pene ya beno! Ntangu yayi, ya . . . bantu yango ke katukaka ve na Georgie, mpe na Ohio, mpe bitini yankaka ya yinsi, na mwa tabernacle yayi awa, samu na kuwa munu. Ba ke kwisa awa samu ba ke kwikila Nsangu yina. Yawu yina ba ke kwikilaka. Ba ke kwikila Nsangu yina. Mpe na yina wapi mutindu ya kusungama mpe ya kieleka mu fwana vwanda samu na Nsangu yina! Samu ti, munu mosi ve—ve, mu ke na kusalaka yimbi, kasi mu ke na kutwadisaka muntu yankaka na foti. Beno me mona? Mpe na yina Nzambi ke tula munu kizitu ya bawu, samu ti mu vwandaka yandi yina longaka yawu. Beno me mona?

⁸ Mpe mu ke tuba na beno, ya kieleka ya ke sala beno kubanza na mudindu ntangu beno ke banda na kubanza ya kieleka mutindu yina. Na yawu mu—mu ke sepelaka na mosi na mosi ya beno, na yina mu ke sala mbote na kuzaba ti beno ke tambula na bankama ya bakilometele, na kati ya banzila ya kintulumukina mpe kuna na babala-bala yayi ya nene, kisika ya bisumbula mpe nionso. Lukwikilu ya beno na Nzambi ke belusa beno, na mutindu nyonso, ke nata beno awa mpe ke vutula beno. Beto kele na kyese mingi na kuzwa bankundi ya mutindu yina. Mu

ke sambila ti balusakumunu ya kulutila ya Nzambi kuvwanda na zulu ya beno.

⁹ Ntangu yayi, Lumingu me luta, mu—mu tubaka, “Mbote, beto ke zonzila, mpe na yina mu ke bokila kaka ndonga ya bisambu.” Mu vwanda meka na kusala nzila mosi, samu na kumeka na kuzwa nzila ya kusambila samu na bantu mingi. Mpe kana mu baka mingi mutindu Lumingu me luta, mu . . . muntu mosi ke sambila samu na munu. Mu kwendaka awa, pene ya ngunga ya zole. Mpe mu—mu kabulaka ve bakalati ya bisambu.

¹⁰ Kukabula bakalati ya bisambu kele kisalu ya ngolo. Mu zaba ve kana beno zaba yawu, to ve, bantu ke yinaka beno. Mpe Mpangi Banks Wood, tubaka, kilumbu yankaka yina, na yina beto vwandaka kuna na Kentucky, ti ya ke ndima kieleka mpe ke kabula bakalati ya bisambu kana Billy me kwisa ve. Na yawu Billy, yina vwandaka mwana ya munu mosi, beno zaba, mbote, bawu . . . Mu bakaka mwa mikanda, “Yandi silaka munu kalati ya bisambu mpe yandi pesaka munu yawu ve. Mwa makelele yayi!” Na yawu bawu . . . Yandi lenda pesa bawu ve na muntu nyonso. Mpe beto lenda kuzwa mingi ve na mulonga! Beno me mona? Yandi fwana kukeba munu.

¹¹ Mpe—mpe ntangu beto kwendaka, bokilo ya munu ya kento tubaka, “Bill, nge fwana vutula Billy kuna na bakalati ya bisambu, to,” yandi tubaka, “nge ke zinga ntangu mingi ve.”

¹² Mpe, na yawu, kasi kisika mu salaka kifu, mu bandaka kuswasikisa mabanza, na manima muntu mosi vutukaka, me tuba, “Mu me zimbana, mama zolaka ti ba sambila yandi.” Beno zaba yina bawu ke na kuvutukaka, ya kele samu na kuswasikisa mabanza yina, beno me mona. Na yawu, kasi, mu ke semba bawu ve. Mu ke sala kima mutindu mosi. Beno me mona? Mu ke sala . . . Beto kele bantu, mpe beto nionso zola kuzinga, mpe beto zola zaba yinki kusala. Ya kele yina beto kele . . . Kasi beno lenda kaka kukwenda ntama mingi na bima yango, beno, ya dikabu, mpe na manima beno ke lembe kaka mingi, ntangu mwa bantangu yina ke kwisa.

¹³ Mpe na yawu Mpangi Banks zolaka kabula bakalati ya bisambu na suka yayi, mpe Billy kwizaka mazono na nkokila. Na yina mu banzaka ti ya ke vwanda yimbi, samu na kuvwanda na bakala mosi na lukumu ya mbote, bima mutindu Mpangi Wood, samu na kukabula bakalati ya bisambu, kunata bantu na zulu ya yandi. Mu banza ti Billy ke na dibanza ve. Yandi vwandaka kaka na bawu na ntangu ya yinda, na yina yandi ke bika yawu kukwenda. Mbote mingi.

¹⁴ Ntangu yayi—ntangu yayi sabala yayi ke kwisa mu ke vwanda na Dallas, na nkokila yayi ke kwisa, na Ndinga ya Kubeluka ya nzutu. Kana ya kele na bantu pene-pene kuna, mu fwana vwanda kuna samu na nkokila mosi yina, samu na

kuzonza na lukutakanu ya bawu. Mpe mu zola kuzonzila na dilongi ya *Kubelama Na Kubundana*, kana Mfumu zola.

¹⁵ Mpe na yina, mu banza, mu banza Lumingu ke kwisa, yina ke vwanda Lumingu ke kwisa, kana Mfumu zola. Ntangu yayi mu ke ndima ve. Kana Mfumu zola, Mu zola vutuka mpe kuzonza na zulu ya dilongi yina mu zolaka zonzila bubu yayi, *Mupepe Na Kati Ya Kitembo*. Mpe mu zolaka sambila samu na bambevo, bubu yayi. Mpe ya kele mutindu ya nsembolo ya nene samu na—na dibuundu samu na masumu ya yandi. Mpe—mpe yina kele ve kima ya mbote na kuzonzila ntangu beno ke bokila ndonga ya bisambu. Beno fwana tunga lukwikilu ya bantu na . . . samu na kisambu, mpe samu na Nzambi, mpe samu na kuvwanda na lukwikilu. Na yawu mu tubaka na Mpangi Neville na kuzabisa ti mu ke zonza na suka yayi na zulu ya dilongi yankaka, ke tunga lukwikilu na kati ya bantu, na Nzambi. Bandinga yankaka, ke semba bantu samu—samu na kuzitisa ve misiku ya Nzambi. Mutindu yayi, ya ke na kutunga bantu pene-pene, samu na kuvwanda na lukwikilu na Nzambi. Beno me mona?

¹⁶ Mpe kuna na kati ya kivinga ya bisambu na suka yayi, to kivinga yina ba me kanga na manima kuna, nkundi mosi ya munu ya kiboba, Mpangi Kidd, ya bamvula makumi nana na mosi, makumi nana na nana, yina me vwanda awa. Mingi na kati ya beno ke bambuka moyo ntangu mu kwendaka nswalu na yandi na suka yina, yandi vwandaka—yandi vwandaka pene . . . yandi vwandaka pene ya mvula mosi me luta, pene-pene na yawu ntangu yayi. Ya vwandaka kufwa, yandi vwandaka na kimbevo ya ngolo, mpe badokotolo pesaka yandi sabala mosi samu na kuzinga. To, sabala mosi ve, bawu . . . Lendaka zinga ve tii na suka samu na kunata yandi awa, pene ya ba-suka tatu. Mpe ntangu yayi yandi kumaka na nkama mosi na tanu, to kima ya mutindu yina. Yandi tubaka, na mwa ntangu fioti me luta, yandi me vutuka na nkama mosi na makumi tatu na zole. Yandi tubaka ti yandi waka mutindu mwana-bakala.

¹⁷ Mpangi Kidd, mu ke kukiyufula kana nge lendaka telema, na yina bantu ke zaba nani kele longi yayi ya kiboba. Yandi yayi. Beto tuba, “Matondo na Mfumu.” [Dibuundu me tuba, “Matondo na Mfumu!”—Mu.] Bakala mosi vwanda kufwa na cancer, na mutindu yina—na kondisyo yina. Yandi kele na mwa nkundi mosi ya luzolo kuna. Mu zola ti yandi telama, mpe. Mu kaka . . . Mpangi-kento Kidd, wapi mutindu nge me kuma kuna? Ntangu yayi, yandi . . . Beno me mona na nswalu nionso? Ya ke vwanda mbote mingi kulutula munu. Nzambi sakumuna Mpangi-bakala mpe Mpangi-kento Kidd. Bika ti balusakumunu ya Nzambi ya kulutula vwanda na zulu . . . Matondo na nge, mpangi-kento.

¹⁸ Bawu vwandaka kutatamana na kati ya miongo ya Kentucky, kumata mpe kukulumuka na banzila ya bilanga ya makala, ya kulemba mingi, ba benganaka bawu, mpe ba vwandaka seka bawu, ba vwandaka niokula bawu, ba

vwandaka zingila na nionso yina ba lendaka kuzwa. Bawu vwandaka nika masangu yina bawu vwandaka kuzwa na piste, kisika mosi kuna, mpe bawu vwandaka zinga samu na Kimfumu ya Nzambi. Mpe bamvula makumi nana, vwandaka longa Nsangu ya mbote, diaka. Ntangu yayi, bawu me kuma biboba mingi, na yina mu ke sambila na zulu ya bitende ya bisambu mpe mu ke fidisa yawu na bawu, mpe ba ke landila kaka—kaka na kunata bawu na balupitalu mpe nyonso mutindu yina. Bantu ke kota mpe ke kuzwa bawu. Ntangu yayi, ya kele kieleka na yawu na kati ya ntima. Mutindu yina ve? [Dibuundu me tuba, “Amen.”—Mu.] Kana beno lenda kwenda ve kutana na bawu, beno lenda fidisa bawu kitende ya kisambu, mutindu yina, bantu me kuzwa lukwikilu. Ya kele kieleka mbote.

¹⁹ Mpangi Rogers, mpe, kisika mosi awa bubu yayi, tata ya Mpangi Creech, nkundi ya munu ya luzolo mingi. Kwenda na yinzo ya yandi kaka mutindu mu ke kwenda na Charlie mpe Nellie mpe bayankaka kuna ntangu yayi, mpe kuna na Kentucky. Mpe—mpe mu vwanda kwendaka kuna mpe kuzomba, ntangu nyonso, na yandi. Mpe awa, ntama mingi ve, pene ya bangonda kumi na tatu me luta, dokotolo zibulaka yandi. “Na cancer, mpe,” yandi tubaka, “yandi me kwenda.”

²⁰ Mpe mu banzaka, “Nkundi ya munu ya ntama ya ntalu!” Veteran, Mvita ya Ntete ya Yinza ya muvimba, bakala mosi ya kikesa, dibuta ya yandi. Mpe mu botikaka yandi na Nkumbu ya Yesu Klisto, bamvula mingi me luta, samu na mulemvo ya disumu ya yandi, na kuzabaka ti ba tulaka yandi na kati ya Nzutu ya Klisto, mpe ya vwandaka ya kukubama samu na kwenda kutana na Nzambi. Mu banzaka, “Mpangi ya munu ya ntalu ke landila na kukwenda na ntwalu ntangu yayi.” Ya vwandaka kaka na manima ya vision yina, to ntete vision yina kukwiza na munu, na yina me tala Mazulu. Mpe kuna mu kwendaka mona yandi, mpe na kati ya kivinga me kwiza mukyama. Nzambi sobaka bima. Yina vwandaka bangonda kumi na tatu me luta, mpe yandi kele kaka awa bubu yayi, ke na kudia.

²¹ Yandi bakaka mwa mutindu, yandi bakaka mwa mutindu ya ba-comprimés ya sufulu, ya me yoka yandi na kati ya laka ya yandi *awa*. Mpe yandi ke vwanda na ndonga ya bisambu, mu banza, na suka yayi, na kintulumukina. Mpe mu zaba ti mu ke zabisa ti na manima Billy me kabula ntete, to ke kabula, mu me zaba ti ba ke kabula bakalati ya bisambu. Mu tubaka na bokilo ya yandi ya bakala, nkundi ya munu ya mbote, Mpangi Creech, samu na kunata—kunata yandi. Mpe mu banzaka, kana mu me kondwa yandi, na yina mu ke simba yandi mpe mu ke tula yandi na kati ya mosi ya bivinga yayi ya bisambu awa. Kasi yandi vwandaka na kalati ya bisambu. Mpe mu tubaka, “Busty, mu zola ti nge basika kuna.” Nkumbu ya yandi kele Everett. Beto ke bokilaka kaka yandi Busty, samu na nkufi. Mpe

yandi—yandi. . . Mu tubaka na yandi, “Kwenda kuna mpe kota na ndonga ya bisambu. Mu ke zola mingi kusambila samu na nge na yina kupakulama ke na kulandana, samu na yawu.” Na yina mu ke zolaka. . . Kana mu zaba ti ba sambilaka munu, mu ke zola muntu mosi ya kupakulama ntangu ba ke sambila samu na munu.

²² Ntangu yayi beto baka Biblia ya beto, na suka yayi, beto zibula yawu na Buku ya Ruth. Mu ke tanga mwa Masonuku na yayi, na Buku ya Ruth. Mpe ntangu yayi kaka ntete beto belama na dilongi yayi. . . Kana mu zola, mu ke zola kuzabisa dilongi ya munu na suka yayi, ba ke bokila: *Tata Mukudi*. Mpe mu ke zola kubelama na yawu na mitindu yiya ya kuswaswana, na zulu ya mpulusu.

²³ Na kubanzaka, Lumingu me luta, vwandaka longa mutindu Klisto kwisaka samu na kuvulusa beto. Mpe na yina, bubu yayi, mu zola kuzonzila: Yinki kele Mukudi? Wapi mutindu Yandi ke kuma Mukudi? Mpe, beno bambuka moyo, Mukudi ke vulusa beno ya muvimba, ntangu Yandi ke vulusa beno; na masumu ya beno, na kimbevo ya beno, na nionso yina kele mbote ve. Yandi kele Mukudi.

²⁴ Ntangu yayi, ntete beto belama na yawu, beto kulumusa bayintu ya beto mpe beto zonza na Yandi, na nzila ya kisambu. Mpe ntangu yayi na bayintu ya beto ya kukulumusa, mu ke kukiyufula bantu yikwa na suka yayi, na Mvwandulu, ke zola ti ba bambuka bawu na kisambu, na kutelemisaka maboko ya beno mpe kutuba, “Nzambi, beno me mona. . . nge zaba lombilu ya munu”? Nzambi sakumuna nge, mosi na mosi.

²⁵ Tata ya beto ya Mazulu, mu kele na kyese mingi, bubu yayi, ti ya kele na Ngolo ya nene ya Mazulu, na kuzabaka ti, Nzambi, ti beto lenda belama na nzila ya Mwana ya Yandi, Klisto Yesu, mpe kuzwa mvutu na yina beto ke lomba. Mutindu na lukutakanu yina me luta, beto vwandaka zonzila mutindu bantu vwandaka yenga-yenga na mpusu ya dimeme mpe ya bankombo, mpe vwandaka bamputu, ba vwandaka sosa Mbanza yina mutungi mpe kisadi vwandaka Nzambi. Na kuzabaka kana bawu lendaka belama mbala mosi na Yandi, kana bawu lendaka kuzwa kisika Yandi vwandaka! Mutindu Job, ya kiboba, tubaka, “Kana mu lendaka kwenda, konkota na kielo ya Yandi,” na mutindu yankaka. “Kana mu lendaka kuzwa kisika Yandi—Yandi ke zinga, mu ke vutuka na Yinzo na Yandi, mpe ke—ke solula na Yandi, mbunzu na mbunzu.” Kasi ya vwandaka ve na mutindu samu na muntu na kusala yawu, samu ti yandi sumukaka, mpe yandi kabwanaka yandi mosi mpe kumaka nzenza samu na Nzambi.

²⁶ Kasi na nzila ya Muntu yina ya ntalu kwisaka mpe zibulaka nzila, mpe lemvo kila masumu ya beto, mpe nata beto na ntwala ya Nzambi, ve mutindu banzenza, kasi mutindu bana ke kwisa

na Tata ya bawu. Na kuzabaka ti Yandi ke pesa beto konso lombilu yina beto ke lomba. Kaka ba me tula musiku mosi, ya kele, “Kana nge lenda kwikila.” Ya kele ngwisani. Satana ke tubaka ti beto ke kwikila ve, mpe Nzambi ke tuba ti beto ke kwikila. Ntangu yayi bitumba ke na kulandila, mpe fwana baka lukanu ya beto. Mutindu nionso lukanu ya beto me salama, ya kele mutindu yina ya ke salama. Mpe ya kele mingi ya ngitukulu ya kusonama, “Nyonso lenda salama na bayina ke kwikila.”

²⁷ Mpe beto ke kwikila, bubu yayi, ke kwisa, ke belama na Nge samu na lemvo ya Kinzambi, na kulombaka ti Nge ke zitisa balombilu ya beto. Mpe konso diboko yina me telama, Nge zaba na yisi ya diboko yina, na kati ya ntima ya bawu, yina vwandaka zola kutuba. Samu ti ya kele ya kusonama, ti, “Nge zaba bansatu mpe mabanza ya dibanza, mpe lenda swasikisa mabanza.” Mpe beto ke sambila, Nzambi, ti Nge ke pesa mvutu landila bimvwama ya Nge mpe lemvo ya Nge, na konso lombilu yina ba me tuba.

²⁸ Beto ke lomba diaka bubu yayi, Mfumu, ti Nge ke sadisa munu, ya kele na nsatu ya kulutila mosi, mu banza, ya nkonga ya bantu; na kuzabaka ti, ba me tula yawu na ntuala ya munu awa, ya kele ntalu ya Menga ya Mfumu Yesu. Ya kele, mu banza, misumuki kele ya kuvwanda awa, yina kele ya kukangama na disumu, ti ya ke vwanda mpasi samu na bawu, ya lenda salama ve, kaka, samu na bawu na kukuma na kisika ya kundima Klisto, ntangu nyonso yina Satana me kanga bawu na ngolo ya yandi. Kasi na kuzabaka ti ya kele ya kusonika, “Na Nkumbu ya Munu ba ke basisa bampeve ya yimbi.”

²⁹ Mpe pesa beto ngolo bubu yayi, Mfumu, na nzila ya malongi ya Ndinga, samu na kubasisa mpeve nionso ya yimbi ya ntembe mpe ya mbanzulu mpe ya boma, na kati ya bantima ya bantu mpe mabanza. Ti bayina me kangama na kidi-kidi mpe na ntembe ba fwana kotisa bawu na maboko ya Klisto. Mpe ya kele mpe ya kusonama, ti, “Bawu ke tentika maboko ya bawu na zulu ya bambevo mpe bawu ke beluka.” Ya kele na bayina awa kele Miklisto, mpe kele ya kukangama na bampeve ya yimbi ya kimbevo.

³⁰ Mfumu, pesa munu ngolo bubu yayi, ya Mpeve-Santu, samu na kuvulusa bambevo nionso mpe bantu ya mpasi yina kele awa na kati ya yinzo ya nene bubu yayi, ti Mpeve-Santu ya nene lenda vwanda na luyalu na kati ya ntima nionso mpe muntu nyonso yina kele na Mvwandulu ya Kinzambi.

Tuba na beto na nzila ya Ndinga ya Nge. Ndinga ya Nge kele Kieleka. Na kuzabaka kaka ve yinki ya kutuba, kasi kuingila lutwadusu ya Mpeve-Santu, ti Yandi lendaka twadisa beto mpe kutwadisa beto na Kieleka nionso. Pesa yawu, Mfumu. Baka nkembo samu na Nge mosi. Mpe pakula kisadi ya Nge. Mpe Ndinga ya Nge me pakulama dezia. Beto ke kumisa Nge,

mutindu Nge ke baka yawu na konso ntima, mutindu beto kele na yawu nsatu. Na Nkumbu ya Yesu Klisto, beto me lomba yawu, Mwana ya Nzambi. Amen.

³¹ Na ntwala ya kutanga, mu fwana kutuba mwa nzonzolo yayi ya fioti yina mu ke zolaka mingi:

Kana beno kele na banzadi yina beno lenda sabuka ve,
Mpe beno kele na myongo yina beno lenda luta ve,
Beno bambuka kaka moyo, Nzambi na Mazulu ke salaka luswaswanu na bima yina bantu yankaka lenda sala ve.

³² Mu ke tanga na Buku ya Ruth, kapu ya 1te.

Ntangu yayi ya salamaka ti na bilumbu yina ntangu bazuzi vwandaka yala, ya vwandaka na nzala na kati ya yinsi. Mpe bakala mosi ya Bethléhem na Juda kwendaka kuzinga na yinsi ya Moab, yandi, mpe kento ya yandi, mpe bana ya yandi zole ya babakala.

Mpe nkumbu ya bakala yango vwandaka Elimelek, mpe . . . kento ya yandi Naomi, . . . nkumbu ya yandi . . . bana ya babakala vwandaka Machlon mpe Kiljon, Ba-Euphrates ya Bethlehem ya Juda. Mpe bawu kwisaka na yinsi ya Moab, mpe zingaka kuna.

Mpe Elimelek, bakala ya Naomi kufwaka; . . . yandi bikanaka, mpe bana ya yandi zole ya babakala.

Mpe bawu bakaka bakento ya bawu na kati ya bakento ya Moab; nkumbu ya . . . mosi vwandaka Orpa, . . . nkumbu ya kento yankaka Ruth : mpe bawu zingaka kuna pene ya bamvula kumi.

. . . Machlon mpe Kiljon kufwaka mpe bawu zole; mpe bakento bikanaka . . . kento bikanaka ya bana ya yandi zole ya babakala mpe bakala ya yandi.

Mpe yandi vumbukaka na babokilo ya yandi ya bakento, ti yandi fwana vutuka na yinsi ya Moab: samu yandi . . . waka na kati ya . . . yandi waka ti MFUMU talaka bantu ya yandi na kupesaka bawu mampa.

Na yina yandi basikaka na kisika yina yandi vwandaka, mpe yandi na bokilo ya yandi zole ya bakento; mpe bawu kwendaka na nzila samu na kuvutuka na yinsi ya Juda.

Mpe Naomi tubaka na bokilo ya yandi zole ya bakento, Beno kwenda, beno vutuka mosi na mosi na yinzo ya mama ya yandi: mpe MFUMU kuvwanda na lutondo na ntwala ya beno, mutindu beno salaka na bantu ya kufwa, mpe na munu.

Mpe MFUMU salaka ti beno kuzwa kupema, mosi na mosi ya beno na yinzo ya bakala ya yandi. Na yina yandi yambaka bawu; mpe bawu zangulaka bandinga ya bawu, mpe dilaka.

Mpe bawu tubaka na yandi, Ya kieleka beto ke vutuka na nge na bantu ya nge.

Mpe Naomi tubaka, Beno vutuka, bana ya munu ya bakento: samu na yinki beno ke kwenda na munu? ya kele dyaka na bana mingi na kati ya kivumu ya munu, ti beno lendaka . . . ti . . . yina lendaka vwanda bakala ya beno?

Beno vutuka, bana ya munu ya bakento, beno kwenda na nzila ya beno; samu ti mu me nuna mingi samu na kuzwa bakala. Kana mu lendaka tuba, mu ke na kivuvu, kana mu lendaka vwanda na bakala mosi diaka na nkokila yayi, mpe mu lendaka buta dyaka bana ya babakala;

Beno ke vingila tii kuna bawu ke kula? beno ke vingila bawu . . . samu bawu . . . samu na kuzwa babakala? ve, bana ya munu ya bakento; samu ti yawu ke nyongisa munu mingi samu na beno ti diboko ya MFUMU me basika na munu.

Mpe bawu zangulaka bandinga ya bawu, mpe dilaka dyaka: mpe Orpa yambaka bokilo ya yandi; kasi Ruth kangamaka na yandi.

Mpe yandi tubaka, Tala, semeki ya nge ya kento me vutuka na bantu ya yandi, mpe na nzambi ya yandi: landa semeki ya nge ya kento.

Mpe Ruth tubaka, Lemvokila munu ti mu bika nge ve, to dyaka kuyambula nge: samu ti kisika nge ke kwenda, mu ke kwenda; mpe wapi kisika nge ke zinga, mu ke zinga: bantu ya nge ke vwanda bantu ya munu, . . . Nzambi ya nge ke vwanda Nzambi ya munu:

Kisika nge ke kufwa, mu ke kufwa, mpe kuna ba ke zika munu. Mfumu kusala mutindu mosi na munu, mpe kulutila diaka, kana ya lendaka kasi lufwa me kabula munu mpe . . . beno mpe munu.

³³ Mu ke zola kubokila mwa disolo yayi ya suka yayi, mutindu mu ke longa yawu, na kumekaka na kunata lukwikilu mosi na beno, ya mpulusu, mpe yina ya kele, mpe mutindu ya kuzwa yawu. Mu zola sadila yawu: *Tata Mukudi*.

³⁴ Ntangu yayi, samu na kuvulusa kima nionso, ya kele “kuvutula yawu.” Kima yina zimbanaka, mutindu kima yina ba tulaka na magazini ya mundefisa. Mpe beno ke kulumuka mpe ke vulusa yawu, ya kele ya kuvulusa na nzila ya ntalu. Na yina ya kele kima ya beno mosi, na manima beno me vulusa yawu.

Kasi musiku ya mpulusu, na Israël, zolaka vwanda tata, samu na kuvulusa kima to kima yina zimbanaka.

³⁵ Disolo ya beto ke banda na ntangu ya bamfumu ya Israel, yina vwandaka bazuzi, na manima ya lufwa ya Josué. Mpe kumona kifwani mosi ya kitoko ya yayi, kutanga pene ya bakapu tanu ya ntete to sambanu ya Samuel ya Ntete, mpe beno ke—beno ke kuzwa disolo ya kieleka ya yawu.

³⁶ Kasi beto ke dumuka ntangu yayi samu na kubasisa dibanza ya ngudi na yayi. Na yina, mwa ntangu fioti me luta, mu bandaka na Buku yayi ya Ruth, mpe mu vwandaka basabala tatu to yiya, mu lutaka na yawu. Bandaka na Buku ya Apocalypse, mbala mosi, mpe bakaka mvula nyonso, na kutala, na kuluta na Yawu. Kaka mwa Masonuku nyonso ke vukana mosi na yankaka, ya muvimba, na nzila ya Biblia. Ya kele kitoko. Na yina, beto zaba ti Biblia me twadisama na kimpeve. Na yina, landila bantalu mpe na mutindu nyonso, ya kele ve na mikanda yankaka yina ba sonikaka yina ke kukitelemina ve kisika mosi kuna.

³⁷ Buku yayi sonamaka pene ya bamvula mafunda yiya na kingenga, Babuku ya Biblia. Mpe ba sonikaka yawu na mwa. . . Mu me zimbanaka kaka bantu yikwa sonikaka yawu. Mu me bambuka moyo. Kasi, beno lemvo kila munu. Mu zola tuba makumi sambanu na kima mosi, kasi mu—mu kele—mu kele. . . Mu lenda vwanda na foti kuna. [Mpangi mosi ya bakala me tuba, “Makumi yiya.”—Mu.] Makumi yiya. Bantu makumi yiya sonikaka Biblia, na kati ya mpwasika ya mafunda ya bamvula kabulaka bawu, na kuzabanaka ata fioti ve mosi na yankaka, to na kumonanaka ve mosi na yankaka, to kutanga na manima ya mosi na yankaka, bambala mingi. Mpe ata ndinga mosi ve ke telemina yankaka. Yawu me twadisama na kimpeve!

³⁸ Ntangu yayi, bantu mingi ke talaka Buku yayi ya Ruth, mutindu bawu ke tubaka, “Ya kele disolo ya zola ya Biblia.” Biblia kele disolo ya zola. Biblia ya muvimba kele disolo ya zola.

³⁹ Ya kele kaka ve Yawu disolo ya zola, kasi Yawu kele profete. Ya kele kaka Yawu ve profete, kasi Yawu kele mpe disolo. Ya kele kaka ve Yawu disolo ya zola, disolo, profete, Ya kele Nzambi Yandi mosi. Samu ti, “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi.” Na yawu, Ndinga kele Nzambi na zulu ya mukanda. Yina fwana sukisa yawu, mpangi-bakala; Nzambi na zulu ya mukanda. Yehowa, yina ba me tula na zulu ya Buku. Mpe ya kele ve na mosi ya yawu kaka mutindu mosi ya disolo, kasi ya kele nyonso kieleka Kieleka. Konso kitini ya Yawu, beno kanga moyo ya beno. Ya kele Kuna. Ya kele Kieleka, mpe Nzambi ke vutula Ndinga ya Yandi.

⁴⁰ Mpe disolo yayi kusunamaka, mpe mikanda nyonso ya ntama. Ntangu ba vwandaka kabula Biblia, bantu ya santu, ntangu ba vwandaka meka na kutula yawu kintwadi na

Ngwisani ya Ntama, Buku yayi ya Ruth vwandaka mosi ya Babuku ya luswaswanu yina bawu ndimaka. Samu na yinki? Kana ya kele kaka disolo ya zola, samu na yinki misoniki mpe bantu ya ntama ya ndwenga ke ndima Buku yayi mutindu ba twadisaka na kimpeve? Samu ti, ya kele na luzayikisu ya kubumbama na kati ya Yawu. Mpe na luzayikisu yayi ya kubumbama, beno ke simba mbangululu ya kieleka. Ya ke nata beno pene-pene mingi na Nzambi.

⁴¹ Mpe mu ke sambila, moyo ya munu ya muvimba, na suka yayi, ti Nzambi ke simba konso ntima, ya kukangama, tii Yandi ke monisama Yandi mosi, kaka yina Yandi kele, na disolo yayi; yina Yandi kele samu na beno; wapi mutindu kundima Yandi. Mpe ntangu beno ke mona yawu mbala mosi, ya kele mpasi mingi ve, beno ke kukiyufula wapi mutindu beno me lutaka ntete na zulu ya yawu. Kasi ya lenda monisama kaka na nzila ya Mpeve-Santu.

⁴² Ntangu yayi, mingi, kutanga Biblia, kutanga Yawu, beno telama kaka mpe beno tanga page, mpe beno tanga page. Ata mbala mosi ve ti beno ke kuzwa Yawu. Samu ti, Yawu kele na bingana. Mpe Yesu tondaka Nzambi samu na kusala Yawu mutindu yina. Yandi tubaka, “Nge me bumba Yawu na meso ya bantu ya ndwenga mpe ya mayela, mpe ke monisa Yawu na bana yina zola kulongoka.”

⁴³ Mutindu mu ke tubaka bambala mingi. Mama Branham kele ya kuvwanda na manima kuna, na suka yayi. Kasi ntangu mu kele na bayinsi ya nzenza, yandi ke sonika munu mukanda. Yandi ke tuba, “Bill ya luzolo, mu me vwanda awa, na nkokila yayi, na bana. Mu ke banza na nge.” Mpe yandi ke kwenda na ntwala mpe ke sonika yina yandi ke sala. Kasi mu—mu zola yandi, mpe mu zaba yandi mbote mingi, mu lenda tanga na kati-kati ya banzila. Mu zaba kieleka yina yandi ke tuba, beno me mona, kana yandi sonika yawu awa to ve. Beno me mona? Samu, mu zaba yina yandi ke tuba. Samu na yinki ya kele? Ya kele kuvukana ya mbote. Beto kele mosi. Beno me mona? Mpe yandi zaba nkadulu ya munu, mu zaba ti yandi kele. Yandi ve. . .

⁴⁴ Yandi lenda kaka kuvwanda mpe kutala munu. Mu lenda tuba na beno yina yandi ke tuba, beno me mona, samu ti mu—mu zaba yandi yina mbote. Mpe yandi lenda sala munu mutindu mosi. Ntangu yayi, yinki ya ke sala, kele na kivuvu na mosi na yankaka. Zola!

⁴⁵ Mazono na suka, beto vwandaka ya kulala na mbeto mwa ntangu me luta, mpe bana zolaka kwenda ve na lukolo, mpe beto fwana tubila bima ya mutindu na mutindu. Mpe wapi mutindu. . . “Yinki vwandaka kuyina?”

⁴⁶ Mu tubaka, “Kuyina kuzwaka mbandukulu, na yawu ya fwana vwanda na nsuka. Zola kuzwaka ata mbandukulu ve, na yawu ya ke vwanda na nsuka ve. Kuyina kele ntangu nyonso.

Zola kele ya Seko. Kuyina bandaka mpe kuyina ke suka. Zola ata mbala mosi ve ti Yawu bandaka mpe ata mbala mosi ve ti Yawu ke suka.” Beno me mona? Ya vwandaka ya Seko.

⁴⁷ Mpe ntangu bakala ke zolaka kento mpe ke kwelana na yandi samu ti yandi kele kaka kitoko, ya ke vwanda na nsuka na yawu. Kasi ntangu bakala ke mona kento yina yandi ke zolaka, yandi zaba ve samu na yinki, kasi yandi ke zolaka yandi. Mpe yandi ke mona bakala yina yandi ke zolaka, ya lenda vwanda yina yandi ke fwanana. Yandi ke zolaka yandi. Yandi ke zolaka yandi. Yina kele bakala ya makwela ya Seko na kati ya Nkembo. Ba ke- . . . Lufwa to kima yankaka ve lenda kabula bawu, samu ti bawu kele ya Seko. Mpe bawu basikaka, na kati ya mpwasika ya ntangu, mpe ke vutuka na Seko. Seko me kulumuka na kati ya nzutu, ba me bokila ntangu, na manima me vutuka mbala mosi dyaka na Seko. Ya lenda kufwa ve.

⁴⁸ Kento yina kele kitoko, kitoko yina ke zimbana, kaka kieleka, beno ke pesa yawu mwa bamvula. Mu banza bubu yayi yandi ke na kudendaka kuna na bala-bala, mwa bakento ndambu fioti kinkonga, ke fidisa myoyo mingi na difelo kulutila banganda nyonso na yinsi, kasi yandi ke baluka yandi mosi na bala-bala, na kubanzaka ti yandi kele *kima mosi*. Mutindu Biblia me tuba, “Ba ke vwanda na bankingu ya ngolo, na lunangu, *kudenda-denda*,” yina zola kutuba kudenda, “mutindu bawu ke kwenda,” na kilumbu ya nsuka. Ke na kulungisa Masonuku, mpe ke zaba yawu ve. Bawu ke telama na lupangu, na bilele ya mansoni, babakala ke tala yandi, mpe bawu zaba ve. Yandi lendaka vwanda mutindu ngolo samu na bakala ya yandi to nkundi ya yandi ya bakala mutindu yandi lendaka vwanda, kasi na Kilumbu ya Lufundusu, yandi ke pesa mvutu na kusalaka kinsuza na bankama ya bantu. Mpeve na zulu ya bawu, mpe bawu zaba yawu ve. Biblia ke tuba, “Kinkonga, mpofo, mpe zaba yawu ve.” Kitini ya mawa kele “kuzaba yawu ve.”

⁴⁹ Kasi beno zaba, mwa kidimbu yina ba me sala mbote, yina Nzambi pesaka mwana-kento yina, lendaka vwanda ya kupola na ntangu yayi na Lumingu ke kwisa? Bakala yina ya yinda, ya ndombe mpe ya kitoko lendaka vwanda kima yankaka ve kasi kaka kikunku ya ba-fard, na Lumingu ke kwisa. Nionso yina ke kufwa.

Kasi yina na kati, Nzambi, zola, ke zinga samu na Kukonda nsuka. Na yina, beno tala mbote na kati. Beno kanga meso ya beno na dibulu.

⁵⁰ Ntangu yayi, disolo yayi me banda kima mosi mutindu yina, mutindu kento ya mbote yina ba lendaka kuzola, ya lembami. Nkumbu ya yandi vwandaka Naomi. *Naomi* zola kutuba “ya kitoko.” *Elimelek* vwandaka bakala ya yandi, yandi zola tuba “kusambila.” “Kusambila ya kitoko” vwandaka dibuta ya yandi. Bawu kuzwaka mwana mosi ya bakala, *Machlon*, mosi yina zola

kutuba “kimbevo.” Mpe *Kiljon*, yina yankaka, me tuba “muntu ya kulomba, muntu ya mawa, kyadi.” Ya wvanda na dibuta.

⁵¹ Mpe ya kuna kwisaka nzala na yinsi ya Israel. Mpe kifu ya ntete Juif mosi ke salaka, kele, kubika yinsi yina. Nzambi pesaka bawu yinsi yina. Ntangu ba pesaka Abraham yinsi yina, Nzambi tubaka na yandi na kubika ve yinsi yina. Mpe yandi salaka kifu ntangu yandi kotaka na Guerar, yandi kotaka na mpasi. Juif ke bika ata fioti ve Palestine. Yina kele kisika ya yandi yina ba me zenga.

⁵² Mpe ba basisaka bawu, bisika nyonso na yinza. Mpe ntangu yayi ba ke na kuvutukaka dyaka. Oh, ya kele disolo mosi ya kitoko mingi yina kele na beto awa, na suka yayi. Ba ke na kuvutukaka.

⁵³ Naomi kufwaka samu na nzala, Naomi mpe Elimelek, mpe bawu kwenda kuna na Moab.

⁵⁴ Ntangu yayi samu na kuvutuka na disolo, na yina, mutindu beno ke kuwa, beno ke vwanda na lenda ya kubakula yina yawu kele.

Ntangu yayi, bantu ya Moab- . . . bantu ya Moab, kubanda mwana ya makangu, yina vwanda bana ya bakento ya Lot. Na manima bawu me vuluka na tiya ya Sodome, na nzila ya lemvo ya Nzambi, na yina bana ya bakento bakaka tata ya kulawuka malafu mpe zingaka na yandi, mutindu kento. Ba butaka mwana. Mpe mosi ya bawu vwanda ya kisina, mpe kotaka na yinsi ya Moab, yina zolaka vwanda Baklisto, kasi ba vukanaka na bumpani. Mpe, beno me mona, bikaka yinsi ya nsilulu, ya lenda vwanda yinki mutindu yimbi ya vwanda, samu na kuzinga kuna na yinsi yankaka, nataka mpasi.

⁵⁵ Mpe ntangu nyonso yina mukwikidi ke katukila ntoto ya yandi yina Nzambi pesaka! Bambala mingi, na politiki, nsodolo yayi ke kwisa mpe nyonso yina, muntu ya mbote lenda vwanda muntu ya mbote, mpe yandi ke yenga -yenga na ntoto yina. Mutindu longi mosi mu zaba, yina ke kwenda mbangu samu na kuvwanda mfumu ya mbanza. Mpe ntangu yandi salaka mutindu yina, yandi katukaka na ntoto ya yandi ya ministere, mpe Satana kangaka yandi.

⁵⁶ Kana Muklisto mosi kubasika na ntoto yina. “Mbote, mu ke kwenda kaka kuna, na nkokila yayi, kuvwanda na bana-babakala na kati ya kivinga ya billard, na mwa ntangu fioti. Mu ke sala yimbi ve. Mu ke kunwa kaka mwa maza mosi.” Beno kele na ngaanda ya ntoto ya beno. Vutuka. Nge kele kaka ya kuvwanda kieleka samu na mpasi.

⁵⁷ “Oh, bana-bakento nionso nwaka makaya. Mu ke meka kaka mosi.” Beno kele ntama na kisika ya beno. Beno sala yawu ve. Beno vwanda na yinsi ya beno. Ve, “Mbote, muntu nyonso awa, ba ke bokilaka munu, ‘Kima ya ntama.’ Ba ke bokilaka munu,

‘Muntu ya ntama.’” Beno vwanda kuna, na mutindu nyonso. Yina kele kisika ya beno. Beno bikana na kati ya Klisto.

⁵⁸ Naomi, samu na nzala, vwandaka kuyenga-yenga na bayinsi mpe kotaka na Moab, na kuzwa dimpa. Yandi zolaka sala yawu ve, samu ti bayankaka ya bawu vwandaka na Judée, na Bethlehem. Bethlehem zola kutuba, *Béthel*, “yinzoye Nzambi,” yinzoye ya balukumu. Mpe bawu bikanaka kuna.

⁵⁹ Mpe yandi vwandaka yenga-yenga na bakala ya yandi. Mpe bana ya yandi zole ya babakala kwelaka bana ya bakento ya Moab. Kasi kana Nzambi tumaka kima mosi na kusalama, ya ke salama kaka na mutindu nyonso. Ya kele samu na yina kieleka mu ke kwikilaka na nsodolo ya mantwala, luzabu ya mantwala ya Nzambi.

⁶⁰ Na yina beto ke mona, kuna, lufwa bulaka dibuta, mpe bawu bandaka na kuvutuka. Kufwa... Mwana-bakala yango kufwaka, bana-babakala zole kufwaka, mpe tata kufwaka. Mpe Ruth bandaka na manima, Orpa, mpe Naomi.

⁶¹ Ntangu yayi, mu zola fwanikisa, na suka yayi, Naomi, mama ya kuluntu, na dibuundu ya ba-Orthodoxe, dibuundu ya ba-Juif ya ba-Orthodoxe. Ruth, Moab, Muntu ya makanda, na kuvwandaka Dibuundu ya Miklisto, Dibuundu ya Malu-malu.

⁶² Mpe mu zola tubila yawu, na bitini yiya ya luswaswanu, Ruth. Mu sonikaka yawu awa. Ruth, kubaka lukanu, kubaka lukanu ya yandi; Ruth, na kusadilaka; Ruth, kupema; Ruth, kuzwaka musendo. Mutindu beto ke vutuka: Ruth, kubaka lukanu; Ruth, na manima yandi bakaka lukanu ya yandi, na manima Ruth ke na kusadila; na yina Ruth ke na kupema; na manima Ruth ke kuzwa ndandu.

⁶³ Ntangu yayi, na nzila na manima, kuna me kwiza ntangu mosi, mutindu yandi vwandaka kifwanukusu ya Dibuundu, to Muklisto. Mutindu, konso muntu ke talisaka yinsi ya muvimba ya Buklisto. Beno zaba yawu? Beno, na nkadulu ya beno, na mutindu beno ke salaka mpe yina beno ke salaka, beno ke monikisa Nzutu nyonso ya Klisto. Beno ke tuba, “Kasi mu kele kaka mambele ya layiki.” Yina ke dyambu ve. Ntangu beno ke baka nkumbu yango ya Muklisto, beno ke monikisa Klisto mpe Dibuundu ya Yandi. Beno fwana zinga mutindu yina. Beno fwana zinga mutindu batata, mutindu bamama. Beno sala ata mbala mosi ve bima ya yinza, samu ti meso ya muvimba ya Mazulu mpe ntoto kele na zulu ya beno, samu na kutalisa kima yina. Ya lenda vwanda yinki mutindu beno kele ya kulemba, yinki mutindu beno kele fyoti, beno simba yintu ya beno mbote, mpamba ve ti beno kele Muklisto.

⁶⁴ Ntangu yayi, Ruth vwandaka mumpani, yandi vwandaka sadila biteki, mpe mutindu mosi vwandaka Orpa. Mpe bawu vwandaka na nzila ya bawu, ya vwandaka vutuka na bokilo ya kento. Samu ti, yandi kuwaka, ti, kuna na Bethlehem na Judée, ti

Nzambi nangunaka mpasi, mpe bantu vwandaka kuzwa dimpa. Yandi vwandaka kuna pene ya bamvula kumi, na yina Edersheim ke tubaka, “pene ya bamvula kumi,” muntu ya masolo.

⁶⁵ Mpe ke vutuka, na mawa (mpe bakala ya yandi kufwaka, bana ya yandi kufwaka), na misiku ya yandi zole ya kento. Na ntangu yina yandi balukaka, fwana, mpe talaka na zulu ya bawu, mpe tubaka, “Samu na yinki nge ke kwenda na munu? Ntangu yayi, nge lenda sala kima yankaka ve kasi kuzwa mpasi.” Yandi tubaka, “Lemvokila munu samu ti diboko ya Nzambi me mwanganaka na zulu ya munu.”

⁶⁶ Bambala yikwa Israel banzaka yawu, na kuzabaka ve ti ya vwandaka dinaka nionso ya Nzambi! Mutindu kibaka ya kudila kele kaka na ngaanda ya Jérusalem, dyaka kuna! Matadi ya ntama ya tempelo, ba lokotaka yawu mpe salaka kibaka. Mpe bawu vwandaka ya kunikama, ya kulengula, na masa ya meso mpe ke dila, na maboko ya ba-Juif, ke dila mpe na kulombaka Yehowa, “Yehowa!” Ba ke bakula ve ti ngunga ya bawu me belama ntangu yayi. Bibaka ya kudila, “Matadi yayi mbala mosi vwandaka na kati ya Nzasa ya Ngwisani. Ntinu David talaka na zulu ya matadi yayi. O Yehowa, wapi kisika Nge kele?” Beno me mona? Na kuzabaka ve ti ntama mingi ve Ntinu ya yandi ke vutuka, Mukudi ya yandi. Ba zolaka basisa bawu, na mwa nsungi ya fioti.

⁶⁷ Naomi kukiyufulaka, “Samu na yinki diboko ya Mfumu vwandaka yimbi mingi samu na munu, bokilo ya munu ya kento? Nzambi me basisa munu na ngaanda. Mu kele muntu ya ngaanda. Mu zaba ve yina mu me sala, kasi mu kele muntu ya ngaanda.” Beno me mona?

⁶⁸ Nzambi vwandaka ke sala dinaka ya Yandi. Samu ti, “Bima nyonso ke salaka kintwadi samu na mambote ya bayina ke zolaka Nzambi,” ya lenda vwanda nyonso yina ya kele.

⁶⁹ Yandi tubaka, “Beno vutuka na mama ya beno, mpe beno tala kupema na yinzo ya bamama ya beno. Babakala ya beno kele ya kufwa. Mpe beno kele bantwenya, bakento ya kitoko. Beno vutuka. Beno vutuka na kisika beno me katuka. Kuna beno mona kupema. Nzambi tala beno kyadi, samu ti beno vwandaka mutindu ya bantu ya kufwa. Mpe beno me zinga na ngolo kubanda babakala ya beno me kufwa. Mpe nge vwandaka mutindu samu na munu, mufwidi ya kento ya kiboba yina vwandaka ve na bakala, mpe nge kangamaka na munu. Vutuka, mpe Nzambi pesaka nge kupema na yinzo ya nge.” Bawu dilaka.

⁷⁰ Yandi tubaka, “Kana . . . Mu kele kiboba. Mu lendaka dyaka ve kuzwa bana. Kasi kana mu zolaka kuzwa bakala mpe kuzwa mwana, wapi mbote ya zolaka sala? Beno zolaka vingila ata mbala mosi ve bébé yango.” Yina vwandaka kieleka musiku na bilumbu yina. Ti kana mpangi mosi ya bakala kufwaka, to . . . mpe, ya yandi, mpangi ya bakala yankaka yina na kuvwandaka

yandi mosi, yandi zolaka baka kento ya yandi samu na kuvumbula nkumbu na mpangi ya yandi ya bakala ya kufwa. “Kasi, yandi,” yandi tubaka, “nge ke vingila yandi ve, ba-bébé yayi. Na yina, beno vutuka mpe beno tala beno mosi na bayinzo ya beno ya babakala. Beno vutuka na mama ya beno.”

⁷¹ Mpe, Orpa, kifwanukusu ya dibuundu ya tiya ve madidi ve yina bandaka, kifwanusu ya dibuundu yina ke kwenda nzila nyonso ve. Yandi tubaka, “Ya ke wakana mbote mingi.” Na yawu, yandi yambaka bokilo ya yandi mpe vutukaka dyaka. Yina kele kifwani ya mukwikidi ya madidi ve tiya ve, yina ke kwikila ti Yesu kele Klisto, na manima kubaluka mpe kuvutuka na kima yina wapi yandi basikaka. Na muntu yina ke tenda nzila na bantu ya fioti ya Mfumu yina ba me manga, mpe na manima yandi ke baluka, yandi ke vutuka na manima. “Mutindu yimbwa na biluki ya yandi, mpe ngulu na poto-poto ya yandi,” mutindu Biblia ke tuba.

⁷² Ntangu yayi, yandi vutukaka na banzambi ya yandi. Ntangu mingi beto ke vutuka na banzambi ya—ya beto na mbandukulu. Mu banza ti beto kele na meso ya kulula kima ya yimbi. Beto ke vutuka dyaka na kulula. Ya lendaka vwanda ti beto kele na biteki yina ke kolaka malafu, biteki ya ke kolaka malafu, biteki yina ke vuna, biteki ya ke kuyibaka, mitindu nyonso ya biteki; mpe na manima beno funguna mpe beno baka mbotika, mpe na manima beno ke baluka dyaka. Wapi kima ya mawa! Beno bambuka moyo, ba zonzaka dyaka ve nkumbu ya yandi. Ba tulaka yandi na ngaanda samu na lukanu ya yandi.

⁷³ Dibundu ya tiya ve madidi ve, mukwikidi ya tiya ve madidi ve, mutindu konso mukwikidi ke monikisa dibuundu. Ba-Américain nionso ke talisa Amerique. Ba-Allemand nionso ke talisaka Allemagne. Muklisto nionso ke monikisaka Klisto.

⁷⁴ Awa yandi vutulaka yandi, samu na kuvutuka na kima yina yandi basikaka. Mutindu bantu yina, ata mpe milongi, ntangu yankaka, ke baka nzila ya Mfumu, mpe ntangu beno ke zonza na bawu na yina me tala mbotika ya Mpeve-Santu: “Buzoba,” beno kwenda ntama na Yawu. Ya kele Orpa.

⁷⁵ Tuba na bawu Nkumbu ya Yesu Klisto, ti, “Ya kele ve na Nkumbu yankaka na yisi ya Mazulu yina pesamaka na kati-kati ya bantu na nzila ya yawu beno fwana kuzwa mpulusu. Nyonso yina beno ke sala na ndinga mpe na kisalu, beno sala yawu nyonso na Nkumbu ya Yesu Klisto, kana ya kele ve na Nkumbu yankaka na yisi ya Mazulu na yina beno fwana kuzwa mpulusu.” Na yina Pierre tubaka, na kilumbu, Kilumbu ya Pantekote, “Kana beno zola kuzwa mpulusu, beno balula ntima mpe beno botama, na Nkumbu ya Yesu Klisto, samu na mulemvo ya masumu ya beno.” Ya kele yinki mutundu yina ba me lemvokila bawu. Mpe bakala mosi, samu na kuzabana, yandi lenda ve kukanga Biblia na zulu ya yawu. Kasi samu na kuzabana, ke pesa

Dibuundu bézé, ke pesa Nsangu bézé, ke pesa Klisto bézé, “bayi-bayi,” mpe kuvutuka na wapi kisika yina yandi me basikaka. Orpah, tiya ve madidi ve, ba basisaka yandi na ngaanda.

⁷⁶ Kasi, oh, mutindu mu ke zolaka mwa Ruth yina ya ntwenya! Yandi zolaka baka lukanu. Mu zolaka baka lukanu. Beno fwana baka lukanu. Beno ke basika ata fioti ve na myelo yayi, na suka yayi, kukondwa lukanu mosi. Beno ke bika ve kivinga yayi, bubu yayi, to kuvwanda bakala ya kulutila mbote to kento, to bakala ya yimbi to kento. Kumanga Yawu, beno ke vwanda ya kulutila yimbi. Ya ke vwanda mpasi na ntangu ke landa, samu ti beno kuma na Yawu. To, beno ke basika mbote.

⁷⁷ Ya kumaka ntangu ya kumeka ngolo na luzingu ya yandi. Ya ke kumaka ntangu ya kumeka ngolo na luzingu ya muntu nyonso. Mpe Ruth zolaka baka lukanu. Na yawu, Biblia ke tuba ti bokilo ya yandi zonzaka na yandi, “Vutuka na banzambi ya nge mutindu mpangi ya nge ya kento salaka. Vutuka mutindu tiya ve madidi ve salaka. Samu na yinki nge ke vutuka ve.”

⁷⁸ Mulongi ya Nsangu ya mbote, “Kana beno zola kwenda, beno tatamana.” Mulongi ya bukieleka mingi yina ke tula yawu na ntwala ya kitezo ya bantu, “Nge baka lukanu ya nge. Nge telama.” Tiya ve madidi ve, ya kusikama ve na lukwikilu, na kati mpe na ngaanda, ke zonza yawu ve. Kasi kisadi ya kieleka ya Nzambi ke tula yawu na makulu ya nge, “Baka lukanu ya nge.”

⁷⁹ Ruth tubaka, “Mu ke kwenda kisika nge ke kwenda. Bantu ya nge ke vwanda bantu ya munu. Nzambi ya nge ke vwanda Nzambi ya munu. Kisika beno ke zinga, mu ke zinga. Kisika beno ke kufwa, mu ke kufwa. Mpe wapi kisika ba me zika beno, ba ke zika munu.” Beno tala lukanu ya kieleka.

⁸⁰ “Mfumu, mu ke baka Nge mutindu Mvulusi ya munu. Kana Biblia me tuba, ‘Beno balula ntima mpe beno botama, Nkumbu ya Yesu Klisto,’ ti mu ke sala. Kana Biblia me tuba ti mu ‘fwana kuzwa Mpeve-Santu,’ ti mu ke sala. Kana Biblia me tuba na munu, ‘Yesu Klisto kele mutindu mosi mazono, bubu yayi, mpe kukonda nsuka,’ ti mu ke kwikila. Mu ke baka Biblia mpe Nzambi, samu na yina Yandi sonikaka mpe yina Yandi kele, ya lenda vwanda nyonso yina muntu yankaka tubaka.” Beno tala kieleka Ruth.

⁸¹ Yandi bakaka lukanu ya yandi. Yandi zolaka vutuka to kukwenda na ntwala. Beto ke telama na kisika yina mosi, na suka yayi, beto ke vutuka to beto ke kwenda na ntwala. Beto vutuka ata fioti ve. Beto kwenda na ntwala.

⁸² Na yinsi ya nsilulu bawu kwendaka, na yinsi ya bantu ya nzenza. Ruth, kifwani ya mukwikidi ntangu yayi. Yinki? Yinki kele mukwikidi? Ntangu yandi to yandi ke basika, muntu yina me katuka na yinza, yandi ke kota na kati-kati ya bakwikidi ya Baklisto. Bakento yina vwandaka kunwa tabaka, kunwa malafu, mpe ke bula bakalati na bimvuka, mpe nionso yina, mpe ke na

bima ya mutindu na mutindu, mpe mutindu mosi ya “ndeke mosi ya kufuluka,” kasi ntangu yayi yandi me soba. Yandi me baka lukanu ya kukwenda na Nzambi. Ntangu yayi yandi ke kota na kati ya bantu yina ke kwikilaka ve kima ya mutindu yina. Yandi kele nzenza. Yandi fwana tambula mutindu kizieti. Yandi zaba ve bankadulu ya bawu. Bawu nionso kele ya ngitukulu, samu na yandi. Yandi zaba ve yinki ya kusala. Ya kele yina Ruth zolaka kusala. Ya kele yina beno fwana kusala. Ya kele yina mu fwana kusala.

⁸³ Ntangu mu ndimaka Klisto, ba basisaka munu na yinzo ya munu mosi. Ntangu mu ndimaka Klisto, bampangi ya munu ya bakala, bankundi ya munu ya kento, bantu nionso, losaka munu. Kulumukaka na nkonga ya bantu ya ntama yina vwandaka na Mpeve-Santu mpe kwikilaka na Nzambi, na kusadila Yandi. Bana ya bakento, vwandaka kuna na kati ya dibuundu yina, vwandaka ya kuswaswana na yina bana-bakento mu vwandaka kwenda. Bawu talaka mutindu yankaka. Bawu salaka mutindu yankaka. Bawu vwandaka ya ngitukulu, mpe mu vwandaka na boma ya bawu. Bawu vwandaka bantu ya kuswaswana.

⁸⁴ Ya kele yina Ruth zolaka kusala. Yandi zolaka katuka na yandi mosi, tii na bantu yankaka. Yandi ndimaka. Yandi bakaka lukanu.

Mpe beno baka lukanu. Beno fwana kusala nsodolo ya beno. Beno zola kuvutuka na bima ya yinza, to beno zola kulandila na Nzambi?

⁸⁵ Beno zola kusala mutindu yinza mpe bayankaka ya bawu? Na manima yambaka Klisto “bayi-bayi” mpe kuvutuka.

Kasi kana beno zola kubaka nzila ya beno na mwa bantu ya kiadi ya Mfumu, beno kangama na diboko ya Nzambi yina ke sobaka ve. Ata nyonso yina yinza ke tuba, beno kangama kaka kuna. “Nzambi tubaka yawu. Ya kele kieleka. Mu ke kwikila Yawu, ata ti mu lenda talisa yawu ve na luzingu ya munu. Nzambi tubaka yawu. Mu ke kwikila Yawu. Mu me simba kaka awa.”

⁸⁶ Ya kele mutindu yandi salaka na Naomi. “Mu ke bika nge ve. Mu ke kwenda kisika nge ke kwenda. Bantu ya nge ke vwanda ya munu. Mutindu bawu ke salaka, ya kele mutindu mu ke sala. Mutindu bawu ke salaka, ya kele yina mu ke sala. Yina bawu ke kudya, ya kele yina mu ke kudya. Kisika beno ke kufwa, mu ke kufwa. Kisika ba me zika beno, ba ke zika munu. Mpe Mfumu ke sala ya kulutila samu na munu kana mu kubwa kisika mosi.” Yina kele lukanu ya kieleka ya kuvedila. Nzambi ke zolaka balukanu ya mbote ya kusungama na Dibundu ya Yandi.

⁸⁷ “Mbote, Mfumu, kana Nge ke sakumuna munu mpe ke sala *yayi* samu na munu, mu ke sala *yayi-mpe-yayi*.” Yina kele ve lukanu.

88 “Nzambi, mu ke kipe ve yina nge ke sala na munu, mu ke kwenda na mutindu nyonso. Kana mu kufwa, mbote mingi. Kuzinga to kufwa, nyonso yina! Kana ba me seka munu, ke vweza munu, ya ke sala luswaswanu mosi ve, mu ke kwenda kaka na mutindu nionso.” Ya kele lukanu ya mbote ya kusungama, mutindu Rebecca salaka na ntwala yandi mona ntete Isaac.

89 Bibuti ya yandi tubaka, “Bika ti mwana-kento kupesa mvutu. Mwana-kento, yandi kele ya nsungi, bika yandi pesa mvutu.”

90 Yandi tubaka, “Mu ke kwenda.” Lukanu ya mbote ya kusungama, yima salama na nswalu nionso. Yandi bulaka yawu. Yawu yina Ruth salaka. Orpa vutukaka.

91 Ba landilaka nzyetolo. Ruth, na kati ya ntima ya yandi, na kuzabaka ve kisika yandi vwandaka kwenda, kasi kifwani ya Dibundu. Beto ke zinga, mutindu Abraham. Bizieti na yinsi ya nzenza, na kati-kati ya bantu ya nzenza.

Mpe yandi landilaka, mpe na nsuka yandi kotaka na kivinga mpe kisika yina Naomi vwandaka nata yandi. Mpe yinki yandi monaka? Muntu nyonso vwandaka simba yandi na manima mpe vwandaka tuba, “Ruth, beto kele na kyese na kuzwa nge awa”? Yandi monaka kuswaswana. Yandi monaka kima ya yimbi. Yandi monaka mpasi.

92 Mpe milongi yina ke tuba na beno yawu, “Luzingu ya Muklisto kele mbeto ya bafelele,” to yandi ke na kuvuna beno to yandi me ndimaka ata fioti ve nzingulu yina yandi mosi. Yinza ke yinaka beno. Mpe bantu ke yina beno. Beno fwana baka nzila ya mwa bantu ya kiadi ya Mfumu, mpe yina ba vwandaka kuseka, kuvweza, to kima yankaka. Beno fwana vwanda ya kuswaswana. Beno me butuka na Yinsi yankaka.

93 Kento ya munu. . . Mutindu mu ke—ke tanga yawu diaka; ya ke monana mbote mingi na kusala yawu. Yufulaka munu, “Samu na yinki bakento ya Muklisto ke lwataka bilele yina mutindu bakento yankaka ke salaka?” Mu tubaka. . . Yandi tubaka, “Beto nionso kele ba-American, mutindu yina ve?”

94 Mu tubaka, “Ve, tata.”

95 “Mbote, yinki beto kele?”

96 Mu tubaka, “Beto kele ve ba-Allemand, ba-France, ba-Belge, ba-Suisse, Africain, to ba-Américain, to ata mosi ya bawu.”

97 “Kasi yinki beto kele?”

98 Mu tubaka, “Beto kele Baklisto.” Ba-Américain ke salaka mutindu ba-Américain, ba-Allemand ke salaka mutindu ba-Allemand, samu ya kele mpeve ya bawu ya yinsi. Mpe beto kele na Mpeve ya yinsi. Yina kele Mpeve-Santu yina me katuka na Nzambi, na Mazulu, mpe beno ke sala mutindu Yina. Yandi ke

salaka ti beno kusala mutindu bawu salaka na zulu Kuna, samu ti beno kele ya Yinza yankaka.

⁹⁹ Beto ke na kuzinga na Amerika, ya kele kieleka. Ya kele kitini ya nzutu. Kasi moyo yina ke pusa beto, nkadulu ya beto, kele ya Zulu. Beto ke zinga na Zulu samu beto me butuka na Zulu. Baklisto nionso me katuka na Zulu. Yesu tubaka, “Mu me katuka ve na yisi. Mu me katuka na Zulu. Kana mu vwandaka na yisi, bantu ya Munu zolaka nwana samu na Munu. Kasi Kimfumu ya Munu kele ya Zulu.” Mutindu mosi muntu nyonso yina me butuka na Kimfumu ya Nzambi, yandi me katuka na Zulu.

¹⁰⁰ Ntangu yayi, beno tala mbote ntangu yayi. Na yina beto ke landila, beto ke mona bawu kukwiza na kyadi. Ya kele kisika beno ke kota, ntangu beno kele na Mpeve-Santu? Kieleka. Mu salaka. Kuseka, mpe nyonso.

¹⁰¹ Na yina, beno tala, luzingu vwandaka mpasi samu na yandi. Mpe ya kele mpasi na manima beno me kuma Muklisto. Samu beno fwana kukisungika beno mosi na luzingu mosi, ya maseka mpe ya biese ya yinza, na luzingu yankaka, ya kupesama na Nzambi. Beno fwana tanga beno mosi, na lweka *yayi*.

¹⁰² Mpe Ruth zolaka kukisungika yandi mosi na kuvwanda na yinsi yina kisika vwandaka madia mingi, mpe ba vwandaka zitisa nionso, na ntwala ya bantu yina vwandaka seka yandi, yina vwandaka sawula yandi, na kati ya ntoto yina yandi vwandaka tambula na kati ya kilanga samu na yina yandi ke kudiaka. Yandi tulaka yawu na kitambala ya yandi mpe nataka yawu na yinzo. Mpe yandi bulaka yawu mpe salaka mwa dimpa, mpe yandi na bokilo ya yandi kudiaka yawu.

¹⁰³ Ntangu yandi vwandaka kuna, bawu kumaka na kubakula ti, na ntangu yandi vwandaka tambula, to vwandaka kwenda kutambula. . . Ntangu yayi, yandi bakaka lukanu ya yandi. Yina vwandaka lukanu ya yandi.

¹⁰⁴ Ntangu yayi, kima yina ke landa yandi fwana sala kele kusadila.

¹⁰⁵ Mpe ya kele yina Dibuuundu fwana kusala. Dibuuundu, na manima ya kubaka lukanu ya beno, beno fwana kusadila. Sadila Nzambi landila bisono ya Yandi, landila dikani ya Yandi. Beno fwana sadila Nzambi.

¹⁰⁶ Ruth, ke baka lukanu. Ntangu yayi, Ruth, ke baka lukanu ya yandi. Ntangu yayi beno tala mbote kaka minuti. Ntangu yayi yandi kwendaka na kati ya kilanga, samu na kulokota.

¹⁰⁷ Ntangu yayi, mama ya yandi tubaka na yandi; yina, Ngwisani ya Ntama vwandaka tuba Malu-malu, beno zaba. Mama ya yandi tubaka na yandi, yandi tubaka, “Beto me kuzwa tata, mpe nkumbu ya yandi kele Boaz. Yandi kele bakala ya mvwama. Mpe yandi kele tata ya pene-pene. Beno kwenda na

bilanga ya yandi. Mpe mu banza . . . Beno kwenda ve na bilanga yankaka; beno kwenda na bilanga ya yandi.”

¹⁰⁸ Wapi mutindu Mpeve-Santu ke tuba na beto na kukwenda ve na buku mosi ya dibuundu, na mwa catechisme, kasi kukwenda na Bilanga ya Nzambi, Ngwisani ya Ntama, Biblia. Beno tuba ve, “Mbote, beto ke tuba *yayi*. Mpe beto ke tuba *yayi* samu na kisambu. Beto ke kuzwa *yayi*.” Beno vwanda kaka na Bilanga. Beno kwenda kaka na kati ya Yawu, samu ti Yandi kele Tata ya pene-pene.

¹⁰⁹ Ndinga ya Nzambi, Ngwisani ya Ntama, kele Tata ya pene-pene na Malu-malu. Dibundu ya Ntama kele mama samu na Dibundu ya Malu-malu, beno me mona, Muklisto, mukwikidi. “Kukwenda ve na bilanga yankaka. Vwanda kaka na bilanga ya yandi. Mpe mu banza, kilumbu mosi, beno lendaka kuzwa lemvo na yandi.”

¹¹⁰ Mpe kilumbu mosi, na ntangu yina yandi vwandaka kuna na kilanga, bakala yayi ya mvwama, na nkumbu ya Boaz, mfumu, bakala mosi ya mavimpi ya mbote, lutaka, mpe yandi monaka yandi. Oh, ntangu yandi monaka yandi, yandi kubwaka na zola na yandi. Yandi banzaka ti yandi vwandaka kento mosi ya kitoko. Yandi zolaka nkadulu ya yandi. Beno bambuka moyo, yandi tubaka, “Mu zaba, na yina bantu zaba, ti nge kele kento ya ngolo.” Bakaka lukanu ya yandi, ya kutsyema mpe ya pwelele. Beno vutuka kaka, zingaka kaka kieleka yina yandi tubaka ti yandi ke sala.

¹¹¹ Na mutindu yankaka, bubu yayi, bawu ke tuba, “Beto zaba ti nge kele Muklisto. Beto zaba ti nge kele muntu ya Nzambi, samu ti muntu ve lenda sala bimangu yayi kaka ti Nzambi kuvwanda na yandi.”

¹¹² Ya kele yina Nicodeme tubaka na Yesu, yandi tubaka, “Rabbi, beto zaba ti nge kele mulongisi yina me katuka na Nzambi. Muntu ve lenda sala bima yina beno ke sala kaka ti Nzambi kuvwanda na yandi.” Ntangu, yandi lendaka mona Yandi kuvwanda kuna mpe swasikisa mabanza ya kieleka ya ntima ya bawu.

¹¹³ Kento simbaka lele ya Yandi. Baluka, tuba, “Nani me simba munu?” Bawu nionso mangaka yawu. Yandi talaka kuna na kati ya kivinga mpe tubaka, “Nge, na kubasika ya menga kuna, lukwikilu ya nge me belusa nge.”

¹¹⁴ Yandi tubaka, “Muntu ve lenda sala yawu kaka ti Nzambi kuvwanda na yandi. Beto zaba ti Nge me katuka na Nzambi. Beto lenda ndima Nge ve, samu ba ke basisa beto na ngaanda ya dibuundu.” Beno me mona?

Vinu yina ba namikaka, Mpangi West, mutindu beto vwandaka zonzila mazono na nkokila, ba ke basisa beno na ngaanda. “Kasi, kuna na kati ya ntima ya beto, beto zaba ti nge me katuka na Vinu ya kisina.” Klisto kele Vinu; beto kele bintala.

“Beto zaba, samu ti beto ke mona Luzingu mosi yina kele na kati ya Nzambi, ya kele na kati ya Nge.”

¹¹⁵ Ya kele yina Boaz kumonaka na Ruth, lukanu yina ya mbote ya kusungama, ngolo yango ya kento ya kutelama kuna. Mpe yandi kubwaka na zola na yandi.

¹¹⁶ Ntangu yayi, mu zola beno kutala. Naomi, dibuundu ya ntama, bandaka na kutendula na Ruth misiku nyonso na yina me tala nsambulu ya yandi, mutindu Ngwisani ya Ntama kele kivudi ya Malu-malu. Ntangu yayi, mu zola ti beno baka disolo yayi awa.

¹¹⁷ Ntangu yayi, mu zola kulakisa bivudi. Ngwisani ya Ntama ke bangula Malu-malu, kana beno ke tanga kaka Yawu, samu ti Yawu kele kifwani ya mantwala ya Malu-malu. Ntangu yayi, kana mu vwandaka kwenda na lweka ya kibaka yina, mpe mu me monaka munu mosi ve, mpe mu monaka kivudi ya munu, Mu ke zola kuzaba, kuzwa mwa mabanza samu na yina mu ke fwanana. Mpe kana beno ve (beno) zaba yina kele Ngwisani ya Malu-malu, beno tanga Ntama mpe beno ke mona kivudi ya yawu. Beno me mona? Mpe kuna ntangu Ngwisani ya Malu-malu ke kota, beno ke tuba, “Mbote, ya kieleka, yayi kele Yawu.” Buku ya ba-Hebreux, ke vutuka, Paul tendulaka yawu.

¹¹⁸ Ntangu yayi, beno tala mbote ntangu yayi. Ntangu Ruth tubaka, to. . . Naomi tubaka na Ruth, yandi tubaka, “Ntangu yayi, yandi kele tata ya beto. Mpe kana beno lenda kuzwa lemvo na yandi, beno ke kuzwa kupema.” Oh, la la! “Kana beno lenda kuzwa lemvo, beno ke kuzwa kupema.” Boaz monikisaka Klisto, Bakala ya mvwama, kibyadi ya bima nyonso, Mfumu ya kuyonzika. Oh, la la! Wapi mutindu, ntangu Boaz kubasikaka kuna, na kati ya nkonga yango, na kutalaka bisika nyonso kuna na bilanga, mpe meso ya yandi kubwaka na zulu ya Ruth! Yandi vwandaka mulongisi. Yandi vwandaka mfumu ya kuyonzika. Mpe yandi kuzwaka lemvo na meso ya yandi.

¹¹⁹ Ya kele yina Dibundu ke salaka, bubu yayi. Na yina Mfumu ya kuyonzika bambuma, Yandi ke tala ve na bivinga ya nene, ya bangengele ya nene, ba-chorale yina ba me longusa mbote. Yandi ke na kuvingila bantu, babakala mpe bakento yina ba biekaka mpe ya kuvedila samu na Klisto, ba kukipesaka bawu mosi na kisalu ya Yandi. “Nzambi, mu ke kwikila Yawu, konso Ndinga ya Yawu. Ntangu Ndinga ya Nge ke tuba kima mosi, mu ke bikana kaka na Yawu. Yina kele Ndinga ya Nge. Mu ke kwikila Yawu, konso Ndinga.” Yawu yina Yandi ke sosa; Mfumu ya kuyonzika. Ya kele yina Yandi zola kupesa, Mpeve-Santu, na bayina kele na nsatu mpe mpwila. “Kyesa na bayina kele na nsatu mpe mpwila, samu ti beno ke fuluka.” Yandi ke na kumeka na kuzwa Dibundu yango, bubu yayi.

¹²⁰ Ntangu yayi, na ntangu yina, ba yufulaka Ruth na kusala kima yina vwandaka nsoni, kasi yandi vwandaka zola

samu yandi bakaka lukanu ya yandi. Wapi kifwanukusu ya mukwikidi! Wapi mutindu ya kifwanukusu ya kulunga!

¹²¹ Naomi, dibuundu ya ntama, tubaka, “Kulumuka, na nkokila yayi. Ya kele nsungi ya oloze.” Oh, wapi dibanza ya kitoko beto lendaka kangama kaka kuna!

¹²² Naomi mpe Ruth kwizaka kaka na nsungi ya oloze. Nsungi ya oloze vwandaka nsungi ya dimpa, nsungi yina ba vwandaka kabula dimpa ya malu-malu. Mpe Dibuundu, na bilumbu yayi ya nsuka, na nzila ya bamvula mafunda zole ya malongi ya mimpani mpe kima mosi, me kota na nsungi ya oloze, mpe madidi ya Luzingu, Dimpa ya malu-malu, mafuta ya niosi na Zulu. (Russell, zonzila na dimpa ya bwiki!) Yayi kele Yawu, Dimpa na Mazulu. “Mu kele Dimpa ya Luzingu. Batata ya beno kudiaka mana, mpe kele ya kufwa. Kasi mu kele Dimpa ya Luzingu yina me katuka na Nzambi, na Mazulu. Kana muntu kudya Dimpa yayi yandi ke kufwa ata mbala mosi ve.” Mpe Dibuundu na bilumbu yayi ya nsuka awa, me kota, kaka na ntangu yayi, na nsungi ya oloze.

¹²³ Ruth, Muntu ya makanda, ba basisaka yandi, ba benganaka yandi, ba kotusaka yandi, na mutindu ti ba ndima yandi mutindu Kento ya makwela. Klisto me kota, kaka na nsungi ya oloze.

¹²⁴ Yandi tubaka, “Ntangu yayi tula bilele ya nge na zulu ya nge.” (Ve, “Katula bilele ya nge na nge.”) Wapi mutindu ya kuswaswana na bubu yayi! “Bana ya nge ke lwata bilele ya nge, ntangu nge ke kwenda kutana na yandi. Yandi ke ningisa oloze, na nkokila yayi. Kulumuka mpe tula bilele ya nge na zulu ya nge. Kukifika, samu na kukutana na yandi.”

¹²⁵ Bubu yayi, bawu zola kukifika ve bawu mosi. Beno kukifika beno mosi. “Kulumuka, samu yandi ke ningisa oloze. Mpe na manima tula kidimbu kisika yina yandi ke lala.” Beno me sala yawu? Na Golgotha. Bamvula mingi me luta, mu tulaka kidimbu na kati ya ntima ya munu kisika Yandi tulaka luzingu ya Yandi, ti Yandi lendaka baka munu. Beno sonika kisika yina yandi ke vunaka. Beno tala mbote kisika Yandi vwandaka. Yawu yina konso mukwikidi zolaka sala. Beno tala mbote yina Yandi salaka samu na beno. Nsangu ya Lumingu me luta, na zulu ya *Kutala Na Calvaire*, beno tala yina Yandi salaka samu na beno.

¹²⁶ Yandi tubaka, “Beni tala mbote kisika yandi ke na kuvuna kuna. Na ntangu ntangu yina yandi ke na kuvuna kuna na mpongi, samu na kupema, beno ke kwenda kuvuna na makulu ya yandi.” Ve yintu ya yandi; makulu ya yandi, ya kulunga ve. “Mpe ke baka bulanketi yina yandi vwandaka ya kufika, mpe ke benda yawu na zulu ya nge.” Oh! Beno me mona yawu? Oh, la la! Mu zaba ti beno lenda banza ti mu kele fanatiki. Kasi yina ke pesa munu kaka mbote, Mpeve yina ya Nzambi. Beno tala mbote kisika Yandi vwandaka, Calvaire; kisika Yandi lalaka na ntoni; na Gethsémané. Beno tala mbote, mpe komvulaka na makulu ya

Yandi. Beno ke vuna kuna mpe beno ke kufwa, beno mosi, na ya beno. . . Beno bawu yayi. Beno vwanda ya kufika, kuna, na jupe ya Yandi. Yandi tubaka, “Jupe,” yandi bokilaka yawu.

¹²⁷ Mpe Ruth tubaka, “Yina beno ke tuba, ti Mu ke sala.”

¹²⁸ Oh, wapi lukanu ya kieleka samu na mukwikidi! “Yina Biblia ke tuba, ti mu ke sala. Yandi tubaka, ‘Beno balula ntima mpe beno botama, Nkumbu ya Yesu Klisto,’ mu ke sala yawu. Kana Yawu me tuba, ‘Beno kwenda na yinza ya muvimba mpe beno longa Nsangu ya mbote,’ mu ke sala yawu. Kana Yawu me tuba, nionso yina Yawu me tuba, ‘Yesu Klisto mutindu mosi mazono, kukonda nsuka.’ Yina Yawu me tuba samu na munu na kusala, mu ke sala yawu.” Beno me mona, Dibuundu ke baka bantumunu ya Yawu na Ndinga. Yandi me vwanda kuna.

¹²⁹ Ntangu yayi, beno bambuka moyo, yina vwandaka nsoni samu na ntwenya ya mufwidi ya kento yina me vwanda na lweka ya bakala yayi, na makulu ya yandi. Nsoni, na ngaanda ya yinza.

¹³⁰ Oh, beno lenda ndima yawu? Yawu yayi. Beno tala. Beno tala. Yayi kele yawu. Dibuundu, ntwenya ya kento, ntwenya ya bakala, ya kiboba to ntwenya, ba me lomba na kukabwana bawu mosi na yinza, mpe ke kota na kisika mosi, Kimfumu ya Mpeve-Santu, ya kele nsoni na yinza. Na kati ya ntima ya bawu mosi bawu zaba yina yawu kele nyonso. Kasi, na yinza, bawu kumaka fanatiki. Bawu kumaka exalté to kima mosi na dibanza yina, nkumbu mosi ya nsoni. Kasi ba me lomba Dibuundu na kusala yawu. Beno zola kusunika kisika, mpe kuvuna, beno bika yinza bokila beno kima nyonso yina bawu zola?

¹³¹ Nkunga ya ntama, ba vwanda yimbaka:

Mu bandaka na kutambula na Yesu munu mosi,
(Beno me mona?)
Kuzwa kuse, mutindu Jacob, ditadi mosi;
Mpe mu ke tambula na mwa bantu ya kiadi ya
Mfumu,
Mu bandaka na Yesu. Mu ke na kulandaka
nzila.

¹³² Yawu yina. Ata ti, mu ke futa ntalu nionso yina bayankaka ke sala. Kana ya zola kutuba nsoni, kana ya zola kutuba kuzimbisa yinzo, kuzimbisa—kuzimbisa dibuta, bankundi ya beno nyonso, bankundi ya kento, bankundi ya munu ya bakala, nyonso yina ya zola kutuba, mu ke kwenda munu mosi. Mu ke baka nzila. Kana mfinangani ya munu me tuba ti mu kele “exalté, pentecotiste, to fanatiki,” mu ke kipe ve yina bawu ke tuba. Ya ke sala ata luswaswanu mosi ve samu na munu. Mu me banda. Mu me baka lukanu ya munu, mpe mu ke kwenda na ntuala.

¹³³ Ntangu yayi, yandi vwandaka mosi kaka yina lendaka pesa yandi kupema, na kulemba ya bilanga yayi ya vwandaka tambula. Oh, ya vwandaka lembami mingi ntangu, Boaz, ntangu yandi monaka yandi na bilanga. Mu lenda kondwa yayi ve. Boaz

monaka yandi na bilanga. Yandi tubaka, “Tala.” Yandi tubaka, “Nani nge kele?”

Yandi tubaka, “Nkumbu ya munu kele Ruth.”

“Oh, Moabite yina kwisaka kuzinga na beto.”

“Yinga.”

¹³⁴ “Mu me kuwaka na nge. Nge ke kwendaka ve na bilanga yankaka.” Ah! Mu zola yawu. “Beno banda ve na kumwangisa nsangu. Beno vwanda kaka awa na bilanga ya munu. Beno vwanda na ya munu.” Yandi zolaka yandi. “Vwanda awa. Vwanda na munu. Kukwenda ve bisika nyonso na kisika na kisika. Vwanda awa.”

¹³⁵ Kana beno ke kwikila Nsangu, beno kangama na Yawu. Beno me mona? Ata yina ntalu kele, beno vwanda kaka na Yawu. Beno kwenda kaka na ntwala. “Kana ya zola kutuba, munkayulu *yayi, yina*, to *yankaka*. Mpe mu fwana bika kunwa malafu ya munu, fwana bika kuyiba ya munu, kuvuna. Mu ke bikana kaka na Yawu.” Beno me mona?

¹³⁶ Mpe yawu tubaka diaka, yandi tubaka, “Ntangu yayi, ba ke kwamisa nge ve, samu ti mu me tuma bantwenya ya babakala na kufinga beno ve.” Amen. Mu zola yawu, nkebolo ya yandi. Nani tubaka yawu? Mfumu ya kuyonzika.

¹³⁷ Beno sala keba. “Kusimba ve mupakulami ya Munu. Beno sala ve yimbi na baprofete ya Munu.” Ya kieleka? “Ya kieleka, mu ke tuba na beno, ya ke vwanda mbote mingi samu na beno ti ba kanga ditadi ya nene na nkingu ya beno, mpe ba losa beno na kati ya mubu, kana beno me niongisa mosi ya fioti ya bantu yayi, bana ya Munu ya fioti.” Ya kieleka? “Beno niongisa bawu ata fioti ve.”

“Mu me tuma bawu na kusimba nge ve.” Oh, beno tala mbote yinza yango! Ya kele kisadi-bilanga. Ba me kuzwa ngunga ya bawu yina ke na kwiza.

¹³⁸ Na ntangu yina yandi kwendaka na bantwenya ya babakala, bayankaka. Yandi tubaka, “Ntangu yayi, yandi ke na kubukaka samu na luzingu. Ntangu yayi, mu zola ti beno buka. . . beno bawanzio,” na nzonzolo yankaka. Yawu yina bawu kele. Yandi tubaka, “Mu zola ti beno bawanzio, beno miyonziki, na mbala mosi na mwa ntangu fioti, samu na kulosa diboko mosi, na zulu ya lukanu mosi.” Oh! “Beno bika yawu nionso ve kuvwanda ya muvimba samu na yandi. Kasi konso ntangu na mwa ntangu fioti, beno bika yandi kuwa Nsangu ya mbote. Bika ti ngolo ya mbote ya Mpeve-Santu kufika Yandi, na mwa ntangu fioti, samu na kuzabisa Yandi ti mu kele kaka kuna. Sala mutindu mosi ya kubeluka na kati ya Yandi. Beno lakisa mutindu mosi ya kidimbu to kuyituka, ti Yandi ke zaba ti mu kele na kati-kati ya Yandi.” Yawu yina.

139 Beno ke zolaka ve mwa binkuku yayi? Mu banza ti beto ke mona bayankaka na suka yayi, mutindu yina ve? Diboko mosi ya oloze ya malu-malu. Mfumu sala kima yina Yandi sadilaka na kusala. Kima yina beto zaba ti Yandi ke salaka. Yandi kele Mfumu ya Kuyonzika. Yandi kele kaka Yandi yina lenda bika diboko. “Mu ke tuma Bawanzio na kukwenda na lukutakanu yina na suka yayi. Mu zola ti bawu sala kima mosi, kima mosi. Mu tumaka Bawu, mpe Bawu ke sala yawu.” Oh, la la.

140 Ntangu yayi, awa, yandi zolaka baka kisika ya nsoni, samu na kuvwanda, ba bokilaka yandi kima yina yandi zolaka. Ba lendaka bokila yandi kento ya kindumba, beno zaba. Ba lendaka bokila yandi kento ya kuzabana, kasi yandi vwandaka ve. Mpe yandi vwandaka landa kieleka misiku yina ba tulaka na yisi na yandi. Na yina yandi kulumukaka kuna mpe kukifikaka yandi mosi, na vunga yina yandi lwataka. Wapi kisika yandi kwendaka? Na ntoni. Wapi kisika yandi kwendaka? Wapi kisika yandi vwandaka pema.

141 Ya kele kisika mu monaka yawu.

Kuna na kulunsi kisika Mvulusi ya munu
kufwaka,
Mu me kwisa kuna samu na kudila masumu ya
munu;
Kuna na ntima ya munu ba tulaka Menga.
Ya kele na Yinto ya kufuluka na Menga,
Yina basikaka na misisa ya Emmanuel,
Kisika misumuki ke kota na yisi ya kufuluka
ya maza,
Ya ke zimbisa mvindu ya bawu nionso.

142 Beno tala mbote kisika yina Yandi vwandaka, mpe vunaka kuna na Yandi. Beno me kubama na kukwenda na Calvaire, na suka yayi, mutindu mu tubaka Lumingu me luta? Beno me tala mbote kisika yina na kati ya luzingu ya beno? Beno me nata beno mosi na kisika yina ba komaka Yesu na kulunsi?

143 “Oh, beto ke sepela na yawu.” Kasi yinki samu na kukomama ya beno na kulunsi? Beno me kubama na kubaka nzila na nkumbu ya nsoni, mutindu na kuvwandaka exalté, musambidi ya fanatiki, to nionso yina, nionso yina ntalu kele?

144 Beno me tala mbote kisika, na yawu beno ke kwenda kuna mpe ke vuna na Yandi, ke tuba, “Mfumu, munu yandi yayi”? Na manima yinki? Beno benda vunga mosi yina na zulu ya Yandi, beno tula yawu na zulu ya beno.

145 Kento mbala mosi tubaka na Mfumu ya beto, “Mfumu, pesa na bana ya munu zole, ti mosi ke vwanda na diboko ya kibakala, mpe na diboko ya kikento, na kati ya Kimfumu.”

146 Yandi tubaka, “Nge lenda kunwa mbungu yina mu ke kunwa?” Ya kele lukwamusu ya ndudi.

“Yinga.”

147 “Mpe beno lendaka botama na mbotika mosi yina mu me botama?” Beno kulumusa, beno tula vunga mosi yina na zulu ya yandi.

148 Ba zangulaka Elie. Mpe Elie kulumusaka vunga mosi yina yandi kuzwaka, samu na kufika Elisée na bitini zole ya Mpeve ya yandi. Kima mutindu mosi, kaka bitini zole. Ngolo mosi; dyaka ve. Ve, ya kulutila nene; kaka bitini zole ya Yawu.

149 Mutindu Moise, ntangu yandi vwandaka ya kulemba, bokilo ya yandi tubaka na yandi, yandi tubaka, “Nge ke na kulembisa nge mosi. Sambila ti Nzambi ke baka Mpeve ya nge mpe ke tula Yawu na zulu ya bantu yankaka.” Mpe yandi sambilaka.

150 Mpe Yandi bakaka Mpeve mpe tulaka Yawu na zulu ya makumi sambwadi na yankaka mpe makumi sambwadi bandaka na kupesa profesi. Bawu vwandaka dyaka ve na ngolo. Ba vwandaka na mingi ya bamasini. Yimeni. Kima mosi, ba vwandaka kaka na mingi ya bamasini.

151 Ya kele mutindu ya kele, bubu yayi. Muntu mosi lenda sala yawu ve. Nzambi kele na bamasini ya Yandi ya kusala bisika nionso, kasi ya kele ngolo mosi; ngolo mosi, Mpeve-Santu mosi, Yesu mosi.

152 Ntangu yayi, yandi bakaka bulanketi, Mpeve-Santu, na ntangu yandi fwaka samu na yandi mosi. Yandi talaka mbote kisika yina yandi kufwaka, kisika yandi vwandaka samu na kupema. Na ntangu yina yandi lalaka, mpe bakaka bulanketi yina vwandaka na zulu ya yandi mpe bendaka yawu na zulu ya yandi. Mpe bakala yango vumbukaka, yandi tubaka, “Nani kele kuna?” Yandi tubaka. . . Yandi tubaka, “Mu kele Ruth, muntu ya Moab, kisadi ya nge ya kento.”

153 Mpe yandi telamaka. Yandi tubaka, “Mu ke mona mpe mu zaba ti nge kele kento ya ngolo.” Amen. Oh! Yina ke fidisa ve mwa mabanza ya matekita na kati ya moyo ya beno? “Nge kele kento ya ngolo.”

154 Mpe yinki yandi vutulaka mvutu? “Kasi nge kele tata ya pene-pene.” Amen. “Nge kele tata ya pene-pene. Nge lenda sala samu na munu. Nge lenda tula munu na kupema. Mu me kwisa awa mpe me vwanda awa, ve samu na kento ya kukondwa buzitu. Mu lalaka awa, ve samu na kukitalisa; samu na kulakisa bantu mu lenda zonza na bandinga, kulakisa bantu ti mu lenda bina na Kimpeve, mpe kulakisa bantu ti mu lenda boka. Kasi mu me kwisa awa samu nge kele tata ya pene-pene. Samu na kotalisa ve ti mu lendaka sala kima mosi ya nene; kasi nge kele mpangi ya munu ya bakala. Mu me kwisa samu nge me kuma tata ya pene-pene, mpe nge kele kaka yina lenda vulusa munu.”

155 Beno me mona nkadulu ya mundimi ya Klisto, na Dibuundu? Beno me mona? Beno me mona? “Nge kele tata ya munu.”

¹⁵⁶ Mpe yandi tubaka, “Nge kele kento ya ngolo. Mpe mu kele tata ya nge ya pene-pene. Ntangu yayi, kukifika nge mosi. Lala kuna tii na suka.” Ouf! “Vwanda kaka na kati ya bulanketi yina. Mu kele mpangi ya nge. Vwanda kuna tii na suka, pema.” Amen. Amen. “Mu kele tata ya nge. Pema!” Amen.

¹⁵⁷ Ntangu suka kwisaka, kuna na ntwala kubasika ya mwini, yandi kutikaka kinkuku ya nene ya oloze, bitezolo sambanu, mu banza ya vwandaka, mpe tulaka yawu na mwa écharpe mpe kwendaka na yinzo.

Mpe—mpe Naomi tubaka, “Mwana ya munu ya kento.”

¹⁵⁸ Na manima beno me telema na autel, mpe beno me vutuka. “Ntangu yayi yinki ke salama, mama? Yinki ke salama ntangu yayi?” Amen.

¹⁵⁹ “Kupema.” Amen. “Kupema, Ruth, samu ti muntu ke kuzwa ata kupema tii yandi ke sala ntalu ya muvimba ya mpulusu.” Amen. Amen. Ya kele kaka kisika mu me telama. Amen. Yandi ke pema ve tii kuna Yandi me sala ntalu ya muvimba ya mpulusu, samu na kuvulusa beno, nyonso yina beno zimbisaka, nyonso yina beno vwandaka.

¹⁶⁰ Ntangu yayi beno bambuka moyo na musiku ya mpulusu, mutindu beto ke kuma na nsuka, tii na nsuka ya lukutakanu. Musiku nyonso ya mpulusu kele yayi, ti, ntete muntu vulusa kima ya kuzimbana, yandi zolaka vwanda tata ya pene-pene mingi. Mpe kima yina landaka, yandi zolaka vwanda muntu ya kusungama, muntu ya mbote, samu na kusala yawu. Mpe na ntangu yina yandi zolaka vwanda na mbongo mingi, samu na kusala yawu. Mpe na yina yandi zolaka sala kimbangwi na ntwala ya bantu nyonso ti yandi me sala yawu. Mpe kubanda ntangu yina, ya vwandaka kima ya yandi.

¹⁶¹ Na yawu ntangu yayi beno tala. Boaz monikisaka Klisto. Ntangu yayi, Ruth monikisaka Dibuundu, beno, mukwikidi. Mpe ntangu yayi, Nzambi, na Ngwisani ya Ntama, mutindu kaka ti Yandi lendaka kwiza mpe kuvulusa yina zimbana, Nzambi zolaka kuma mpangi ya muntu. Mpe mutindu kaka ti Nzambi zolaka kuma mpangi ya muntu, vwandaka mosi ya bawu. Amen.

¹⁶² Mu ke swasana na Billy Graham, na zulu ya bantu tatu na kati ya Bunzambi, to mulongisi nyonso yankaka ya butatu, na zulu ya yawu. Mu ke kwikilaka na butatu, ya kieleka, kasi na mutindu yina ve, bawu kele bantu tatu. Bawu kele Mosi. Disolo yina kuna, kaka, vwandaka na kima yankaka ve kasi yina, zolaka lakisa yawu.

¹⁶³ Nzambi kumaka muntu. Yandi zolaka kuma mpangi. Mpe Yandi zolaka vwanda ve Nzambi, mpe beto misumuki, bivangu ya Yandi, ya luvangu ya luvangulu ya Yandi, samu ti beto lenda vwanda ve mpangi kuna. Na yawu, Nzambi kumaka muntu, ti muntu lendaka kuma Nzambi, kukuma Nzambi. Amen.

164 Beto, na kuvwandaka bantu, misumuki, Nzambi kumaka musumuki, bakaka masumu ya beto na zulu ya Yandi. Na kuzabaka ata masumu ve, kasi vwandaka musumuki samu ti ba tulaka masumu ya beto na zulu ya Yandi. Ti beto... Yandi kumaka munu, ti mu lendaka kuma Yandi. Beno me mona? Yandi kumaka musumuki, ti mu lendaka kuma mwana ya Nzambi. Yandi kumaka musumuki, ti beno lenda kuma mwana ya Nzambi. Mpe ntangu yayi beto kele bana-babakala mpe bana-bakento ya Nzambi, samu ti Nzambi kumaka mpangi ntangu Yandi bakaka nzutu ya nsuni ya beto, butukaka na kento. Nzambi! Muntu yankaka ve; Nzambi, Yandi mosi.

165 Timothée ya Ntete kapu 3:16 me tuba:

...kukondwa ntembe dinsweki ya bunzambi kele nene: samu ti Nzambi me monisama na kati ya nzutu, . . . Nzambi!

Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi.

Mpe Ndinga kumaka nsuni, . . .

166 Ndinga, kumaka muntu, kumaka tata. Yandi kumaka bakala mosi. Oh! Yandi kumaka lufwa, ti na nzila ya lufwa ya Yandi mu lendaka kuma Luzingu. Yandi kumaka musumuki, ti na nzila ya ludedomo ya Yandi mu lendaka kuma...kuzwa Luzingu. Yandi kumaka mputu, ti munu, na nzila ya bumputu ya Yandi, mu lendaka kuma mvwama. Yandi kumaka yina mu vwandaka, samu ti mu fwana, na nzila ya lemvo ya Yandi, kukuma yina Yandi kele. Oh, la la! Na yina, beno zonzila na bangolo ya Nzambi! Ntangu yayi, ya kele kieleka Masonuku. Mpe ya kele yina Masonuku ke tuba.

167 Ti beto lendaka vanda . . . Yinki zola, Tata me mwangana na zulu ya beto, me tiamuka na zulu ya beto, ti beto yina vwandaka misumuki, banzenza, ntama na Nzambi, lendaka belama na Nzambi, na mutindu ti beto me kuma bana-babakala mpe bana-bakento ya Nzambi, bisadi ve. Dibundu ya Bantu ya makanda kele ata mbala mosi ve kisadi. Ve, tata. Dibundu ya Bantu ya makanda kele mwana ya bakala mpe mwana ya kento. Beno kele bana ya babakala mpe bana ya bakento ya Nzambi, bayina kuzwaka Mpeve-Santu. Ntangu yayi, kana beno kele nkonga ya Orpa, mpe beno me kwenda ntama? Kasi kana beno me lutila na nzila ya Mpeve-Santu, beno me kuma bana ya babakala mpe bana ya bakento.

168 Ntangu yayi, bana-babakala mpe bana-bakento, nani kele na ngolo ya kulutila na ntwala ya Nzambi? Yinki kele Wanzio? Wanzio kele kisadi. Ya kieleka? Bawu kele bisadi ya Yandi. Yinki nge kele? Mwana ya yandi ya bakala mpe mwana ya kento. Yina kele na ngolo ya kulutila na Mazulu, na ntangu yina, musumuki yina me kuzwa mpulusu na lemvo, to Archange yina me telema pene-pene ya diboko ya Yandi ya kibakala? Musumuki, yina me

kuzwa mpulusu na nzila lemvo, kele na kiyeka mingi na Zulu kulutila Archange yina telemaka pene-pene ya Yandi, kukondwa disumu, samu yandi kele mwana. Mwana kele na kiyeka ya kulutila kisadi, ya kieleka.

Oh, beto me zimbana yina beto kele. Beto me zimbana, bambala mingi, yinki salaka beto yina beto kele. Na manima beto me kuma yina beto kele, na yina beto me zimbana mutindu beto me kuma awa. “Ntangu yina Nzambi Yandi mosi. . .”

Oh, yinki zola ya ntalu yina Tata
 Pesaka na dikanda ya Adam yina kubwaka;
 Pesaka Mwana ya Yandi kaka samu na kutala
 mpasi,
 Mpe vulusa beto na lemvo ya Yandi.

Oh, wapi mutindu beto me zaba!

Na kati-kati ya kupasuka ya matadi mpe
 matuti ya mudidi,
 Mvulusi ya Munu ke kulumusa yintu ya Yandi
 mpe kufwaka;
 Vwale ya kuzibuka monisaka nzila
 Na kiesa ya Zulu mpe kilumbu yina ke na
 nsuka ve.

Na Klisto, Ditadi ya ngolo, mu me telama;
 Bisika yankaka nionso kele putulu.

Ntangu mu ke kengila kulunsi yina ke yitukisa
 Wapi kisika Ntinu ya Nkembo kufwaka,
 Mu ke tanga masumu ya munu nionso kasi ya
 me zimbana.

¹⁶⁹ Ya kele kieleka. Mosi tubaka:

Na kuzingaka, Yandi zolaka munu; na
 kufwaka, Yandi vulusaka munu;
 Ya kuzika, Yandi nataka ntama masumu ya
 munu;
 Na mvumbukulu, Yandi nungisaka munu ya
 mpamba ntangu nyonso:
 Kilumbu mosi Yandi ke kwisa—oh, kilumbu ya
 nkembo!

¹⁷⁰ Ya vwandaka dyambu ya Dibuundu. Ya vwandaka na ngaanda ya Yawu. Ya vwandaka ntima ya Yawu. Ntoto yayi me kangama na Menga ya Tata Mukudi yayi, samu na kuvulusa dikanda ya Adam yina kubwaka.

¹⁷¹ Beno tala, awa Yandi kele, Tata Mukudi. Ntangu yayi, kima ya ntete, Yandi zolaka vwanda muntu ya kulunga. Nani vwandaka ya kulunga mingi kulutila Klisto, kulutila Yesu? Na yina, kima yankaka, Yandi zolaka kuzwa mbongo. Yandi zolaka vwanda na lenda ya kusala yawu. Yandi vwandaka na Mazulu. Yandi siamisaka ti Yandi salaka yawu. Yandi lendaka baka

mampa tanu mpe bambisi zole, mpe kudisa bantu mafunda tanu, nataka bitunga tanu ya kufuluka na bitini ya mampa, na manima. Yandi lendaka basisa maza na dibulu ya maza mpe kubalula yawu na vinu. Yandi lendaka basisa mbisi na mubu, mpe kukatula makala na yinwa ya yandi, na wolo. Amen. Yandi vwandaka ve. . .

¹⁷² Kasi Yandi kumaka mputu, kisika ya kutula yintu ya Yandi ve. Yandi kumaka Tata. Ve Tata samu na bamvwama; Tata samu na bantu nionso. Yandi bakaka kisika ya mukudi.

¹⁷³ Na yina yinki yandi zolaka sala? Na yina yandi zolaka sala kimbangi na ntwala ya bantu nyonso. Na suka yina landaka, Ruth tubaka, to, Naomi tubaka, “Kupema, Ruth, nyonso ke vwanda mbote ntangu yayi, samu ti beno me tala lemvo na meso ya yandi.”

¹⁷⁴ Nzambi, bika mu sala yawu. Bika mu mona lemvo na meso ya Yandi. Na yina ntangu suka ke buka:

Ntangu yina mpungi ya Mfumu ke wakana,
mpe ntangu ke vwanda dyaka ve,
Mpe suka ke talana ya Seko, ke lezima mpe
kitoko;
Mpe ntangu mpulusu na zulu ya ntoto ke
vukana na Simu yina yankaka,
Ntangu ba ke bokila liste na zulu kuna, mu ke
vwanda kuna.

¹⁷⁵ Kupema ntangu yayi, na kuingilaka mpulusu ya muvimba. Beno tala, mu kele na Yawu, lufutu ya Yawu, ntangu yayi. “Mu bakaka yinzo mputa ya muvimba ya kufuluka na oloze. Mu kumaka kuna.” Yandi pesaka yawu na yandi, mu tulaka yawu na kitezolo, bakilo sambanu. Sambanu, zolaka tuba, “bamvula mafunda sambanu ya luzingu ya yinza.” Kilumbu ya Muntu kele sambanu. Ba vangaka muntu na kilumbu ya sambanu. Ya ke vwanda na bamvula mafunda sambanu yina ba vangaka yinza, na funda ya sambwadi ya Nzambi kupemaka. Bamvula mafunda sambanu Dibundu ke nwanisa disumu, na Ngolo ya Nzambi ya mampa yayi ya oloze, mpe na manima kukota na Kupema ya Seko. Kieleka. Kupema, vingila. Bakilo sambanu ya oloze yandi tulaka kuna, samu na kunata yandi tii na ntangu ya muvimba ya mpulusu. Mu kele na kyese mingi na kusepela na yawu.

¹⁷⁶ Ntangu yayi, na nswalu, beto kwenda na nsuka ya yawu. Ntangu yayi beto ke mona, ntangu yayi, ti, suka yina landaka, ntangu yandi vumbukaka, yandi vwandaka na kiese, na kuingilaka. Mpe bakala kwisaka. Yandi kulumukaka. Yandi kuzwaka tata yankaka yina kieleka vwandaka na dibanza yankaka na zulu ya kento yango, ntete. Mu ke na ntangu ya kubaka yawu? [Dibundu me tuba, “Amen.”—Mu.] Mbote, kaka mwa ntangu fioti, mpe beto ke kuma kitini ya yawu, na mutindu nionso.

¹⁷⁷ Yina ke landa na kati ya kingana, yina vwandaka na beno, vwandaka dyabulu, samu ti beno sumukaka. Mpe ntete beno vwandaka ya yandi, samu ti, beno vwandaka, beno kele kima ya yandi. “Samu ti beno butukaka na kati ya disumu, ya kusala na kati ya disumu ya nko, kwizaka na yinza na kuzonzaka luvunu.” Mpe yandi zolaka vulusa yawu ve. Beno me mona? Yandi zolaka vulusa yawu ve. Na yawu, Klisto kwizaka mpe kumaka muntu, samu na kukatula masumu ya beto, samu na kuvulusa beto. Beno me mona yawu? Mpe muntu yankaka lendaka ve kusala yawu. Diabulu lendaka kufwa ve samu na masumu, samu yandi vwandaka muntu ya luvunu yina salaka disumu. Beno me mona? Yandi lendaka ve. Yandi ke bebisa difwa ya yandi, nkundi yankaka. Mpe Satana lendaka bebisa ya yandi, samu yandi kele diabulu. Yandi zolaka kuma ve dyabulu yankaka, samu na kukatula dyabulu, dyabulu ya ntete. Yandi zolaka kuma ve disumu, samu ti yandi vwandaka yimeni disumu. Kasi, Klisto, na kuvwandaka ya kukondwa disumu, kumaka musumuki. Yandi zolaka vulusa beto. Alleluia! Beto kele ya kuvulusa. Beto kele *ya kuvulusa*, zola kutuba, “kuvutula.” Beto kele ya kuvulusa.

¹⁷⁸ Na yawu, suka yina landaka, na yina yandi zolaka sala kimbangi ya bantu nyonso. Yandi kulumukaka mpe kutanaka na muntu yayi na mwelo, na ntwala ya bakuluntu. Mpe ya zolaka vwanda na kisika na ntwala ya bantu nyonso. Mpe yandi talaka yandi na kizizi. Yandi tubaka, “Nge lenda vulusa yandi?” Ntangu yayi, kana yandi zolaka vulusa ntete Naomi, samu na kuzwa Ruth; mpe Klisto zolaka vulusa dibuundu ya ba-Juif, ntete, samu na kuzwa Kento ya makwela ya Bantu ya makanda. Yandi kwisaka na Naomi, mutindu nzenza na yinsi yankaka, ya Moab, mimpani. Ya kele yina beto vwandaka, Bantu ya makanda, mumpani. Mpe beno bambuka moyo, yandi zolaka—yandi zolaka kuzwa Naomi. Mpe ntangu yandi kuzwaka Naomi, yandi kuzwaka nyonso yina vwandaka na yandi.

¹⁷⁹ Beno bambuka moyo, ntangu Klisto kwisaka, Yandi zonzilaka ata fioti ve Dibundu ya Bantu ya makanda. Ya vwandaka, kukwenda na bantu ya Yandi mosi, “Yandi kwizaka na bantu ya Yandi mosi. Baya Yandi yambaka Yandi ve.” Yandi vwandaka ntangu nyonso ya bantu ya Yandi mosi. “Beni kwenda ve na nzila ya Bantu ya makanda. Beni kwenda ve na Samarie, kasi beno kwenda na kisika ya mameme ya kuzimbana ya Israel. Mpe na yina beno ke kwenda, beno longa Nsangu ya mbote, beno belusa bambevo, beno vumbula bantu ya kufwa, beno basisa bampeve ya yimbi. Ya mpamba mutindu beno ke kuzwa, ya mpamba beno pesa.” Ya kele kieleka? Fidisaka bawu, zole na zole. Kwenda ntete. . . Mpe Yandi zolaka vulusa dibuundu yina. Mpe ntangu Yandi vulusaka dibuundu yina, Yandi bakaka Kento ya makwela ya Bantu ya makanda. Amen. Yina vwandaka sanduku na kati ya yawu. Beno me mona? Yandi kuzwaka Kento ya makwela ntangu Yandi vulusaka dibuundu.

180 Ntangu yayi, Boaz, yandi zolaka sala bantu nyonso. . . Yandi tubaka, “Nge lenda vulusa yandi?”

Yandi tubaka, “Ve.”

181 Na yina yandi zolaka sala kimbangi na ntuala ya bantu nyonso. Yandi katulaka sapatu ya yandi, mpe losaka yawu na yandi. Yandi tubaka, “Yawu yina. Bika ti Israel nionso kuzaba ti mu me vulusa Naomi, mpe mu ke baka diaka Ruth.” Amen. “Mu ke baka Ruth samu na kento ya munu ya makwela.” Nani ya vwandaka? Mfumu ya kuyonzika. Amen. Yandi yayi. “Mu ke vulusa Naomi, mpe Mu ke baka Ruth. Mpe Ruth ke vwanda kento ya munu ya makwela.”

182 Yinki bawu tubaka? “Bika ti yandi vwanda mutindu—mutindu Léa mpe Rachel mpe bayankaka, kusansa mafunda,” mpe yandi salaka yawu, ya kieleka, “na Israël. Bika yandi vwanda mutindu yina.” Mpe, beno tala, yandi salaka kumekama, kimbangi na ntuala ya bantu nionso.

183 Yinki Yesu salaka, samu na kusala yawu? Yandi salaka kimbangi na ntuala ya bantu nyonso. Na yina, Satana lendaka kufwa ve samu na masumu samu yandi vwandaka musumuki. Yandi kele tata ya disumu. Kasi, Yesu, Yina zabaka diambu ve, Nzambi ya Mazulu, Yina zolaka kufwa ve, me kulumuka mpe me sala kimbangi na ntuala ya bantu nyonso na nzila ya lufwa, me zanguka na kati-kati ya mazulu mpe ntoto. Kimbangi na ntuala ya bantu nyonso; katulaka bilele ya Yandi na Yandi, mpe kangamaka na kati-kati ya mazulu na ntoto, na nsoni. Mpe kufwaka, lufwa ya masumu, lufwa ya nsoni, samu na kuvulusa beto. Kimbangi na ntuala ya bantu nyonso! Amen.

184 Yinki Yandi salaka? Yandi losaka ludedomo ya Yandi mosi; yandi losaka nkembo ya Yandi mosi. Yandi losaka. . . “Mu me kuzwa ngolo. Mu ke zonga na Tata ya Munu, mpe ke kwenda mbala mosi Yandi ke fidisa Munu bankonga makumi zole ya Bawanzio.” Ba lendaka soba kieleka. Wanzio mosi zolaka sala yawu. Ba zolaka bokila yandi samu na bankonga makumi zole. Ya vwandaka pene ya mafunda makumi yiya ya Bawanzio. Yinki bawu zolaka sala? Yandi tubaka, “Mu lenda zonga na Tata ya Munu, na mbala mosi, ya kele kieleka ntangu yayi, Yandi ke fidisa Munu nkonga makumi zole. Bankonga ya Bawanzio ke kwiza awa mpe ke baka yayi.” Yinki mosi ke sala? Mosi ke bebisa ntoto, na sekonde mosi. Beno tala kaka, Yandi vwandaka na mafunda lendaka kwisa. Beno me mona? Kasi Yandi losaka yawu. Yandi tulaka yawu na lweka. Yandi vwandisaka nyonso ya lukumu ya Yandi, bima nionso, na lweka, mpe kumaka musumuki mpe kufwaka samu na beno mpe munu.

185 Ntangu yayi, samu na kumanisa, beto lungaka tuba yayi, samu na kumanisa. Yandi salaka—yandi salaka yawu. Na ntangu yina yandi bakaka Ruth, mpe yandi kwelanaka na yandi. Mpe yandi butaka mwana ya bakala yina ba bokilaka Obed. Obed

vwandaka tata ya Jess. Jess vwandaka tata ya David, yina vwandaka tata ya Klisto, amen, tata ya Mfumu Yesu.

¹⁸⁶ Beno ke mona ve? Na nzila ya ludedomo yina, na nzila ya lukanu yina ya mbote, Yandi kumaka Tata Mukudi ya beto. Nzambi me kuma mpangi ya beto, samu na kukulumuka mpe kuvwanda mutindu beto, muntu, na nzala, na mpwila. “Mu kele na mpwila. Pesa Munu masa ya kunwa.” Mpe ba tulaka vinu na yinwa ya Yandi, litre zole. Yandi vwandaka na mpwila mutindu beto salaka. Yandi zabaka mutindu ya kusala kukondwa.

¹⁸⁷ Yandi vwandaka ya kubela mutindu beto kele. Yandi tubaka, “Ba ke tuba ve na Munu kingana ya ntama, ‘Munganga, belusa nge mosi?’” Kasi bangolo ya Yandi ya nene vwandaka ve samu na Yandi mosi. Yandi vwandaka na ngolo ya kusala yawu, kasi Yandi lendaka ve kusadila yawu na Yandi mosi. Ve.

¹⁸⁸ Muntu mosi tubaka na munu, kilumbu yina, yandi tubaka, “Mpangi Branham, ntete kima kusalama, nge zaba nyonso yina ke salama na nge.”

¹⁸⁹ Mu tubaka, “Dikabu kele samu na munu ve. Mu lenda sadila yawu ve samu na munu mosi.” Ya kele samu na beno. Beno kele yandi yina ke kuzwaka ndandu ya mbote, munu ve. Mu kele kaka kisadi ya Nzambi, samu na beno.

¹⁹⁰ Mulongi kele kisadi ya bantu nyonso. Yandi kele kaka ya kukangama na yandi mosi kuna. Mutindu lis ya kilanga, niosi yina ke niungutaka ke niunguta kuna, samu na kuzwa kitini ya yandi. Niosi ke pumbuka mpe ke baka ya yandi. Kizieti ke kuzwa ya yandi, mpe nionso. Yandi ke tala mpasi, kilumbu mpe mpimpa, samu na kukeba kungenga ya yandi. Mpe mulongi ya Nsangu ya mbote ke salaka kima mutindu mosi; ke tambula na ndonga ya Nzambi. Yandi me simba kimbangi ya yandi kieleka, ti yinza lendaka vukana na yandi, beno me mona, Tata Pasteur Lis. Yandi kele ya mbote. Yesu tubaka, “Beno tala yandi. Salomon kele ve mutindu yandi.” Ya kele kieleka. Docteur Lis, mu banza ti beno nyonso zaba yandi. Beno me mona?

¹⁹¹ “Beno tala ba-lis ya bilanga, mutindu bawu ke sala mpe ke toka, to ve. Mu ke tuba, mpe, dyaka, Salomon, nkembo ya yandi nyonso. . .” Lis fwana kunwana, kilumbu mpe mpimpa, samu na kuzwa kungenga samu na kukeba bilele ya yandi, samu na kukeba mananasi mpe bima yina ke landila. Mpe bayankaka. . . Yandi ke zibula kaka yandi mosi, mpe bawu ke kwisa mpe ke basisa yawu na yandi. Nyosi mpe banzini, mpe nyonso, ke kwiza, mbote to yimbi, ke baka kaka yandi.

¹⁹² Ya kele mutindu kisadi kele, ya Klisto, kisadi ya Muklisto; ke zibuka yandi mosi, “Baka kaka munu, yinza.” Ya kele ve na kima samu na yandi mosi. Ya kele samu na bayankaka. Ya kele yina Klisto kumaka ntangu Yandi kumaka mpangi ya beto. Yandi kumaka muntu, ti yinza lendaka kota na ludedomo ya Yandi, beno me mona, mpe kuvwanda bana ya Nzambi.

¹⁹³ Ntangu yayi, yinki bawu salaka? Bawu kwelanaka, mpe na nzila ya yina kwisaka kima yayi ya nene. Na yina ba pesaka Ruth musendo, na kubakaka Klisto . . . to na kuzwa Boaz samu na bakala ya yandi. Na yina, ba ke pesa musendo na Dibuundu, na ntangu Nkwizulu ya Mfumu ke kwiza, na suka yina ya nsemo mpe ya kukondwa matuti. Beto ke na kupema, ke na kuvingila ntangu yayi. Ya ke kwiza. Ntangu yayi, samu na yinki? Ya kele ya kuvulusa.

¹⁹⁴ Ntangu yayi, disonuku mosi dyaka ntete mu kwenda, samu na kubanda ndonga ya bisambu. Masonuku mosi dyaka. Mu talaka na zulu, na suka yayi, ndinga *vulusaka*. Mu kaka . . . Beno lemvolila munu, bampangi ya munu ya ba-Arminien, kasi mu fwana tula yayi na kati; samu na kunyongisa ve, kasi kaka samu na kusala beno kubanza. Beno tala yina *mpulusu* zola kutuba. Mpulusu, kieleka ba me sadila yawu, na mpova ya Greki, kubaka mpika na zandu. Mu lenda ve kutanguna mpova ya Greki na ntangu yayi, kasi ya zola kutuba, “kubaka mpika mosi na zandu,” samu na *kuvulusa*.

¹⁹⁵ Muntu mosi me sala kima mosi ya yimbi, na yina, yandi, mfumu ya yandi tekaka yandi na kimpika, ya kieleka tii na lufwa. Mpe yandi kele na kati ya zandu, yandi kele mpika. Kasi muntu ke kwisa, muntu ya kulunga yina kele na kiyeka ya kusala yawu, mpe ke mona muntu yayi, mpe ke mona lemvo na meso ya yandi, yandi ke vulusa yandi. Ya ke katula yandi na zandu ya kimpika, mpe ke basisa yandi na kati ya yandi mosi. Beno tala. Mpe mpika yina, na manima ba me vulusa yandi, ba lenda ve kutekisa yandi dyaka na zandu. Amen. Ba lenda tekisa yandi diaka ve. Ba me tula yandi kidimbu. Mpe kana yandi vwandaka banza mingi, kilumbu mosi, samu na kuvulusa, muntu ve lenda, ata mbala mosi ve, kutekisa yandi dyaka mutindu mpika.

¹⁹⁶ Oh, matondo na Nzambi, ti ntangu muntu me kwiza mbala mosi na Klisto mpe me kuzwa mpulusu na nzila ya Menga ya ntalu, diabulu lenda ata fioti ve kusala beno mpika diaka. Beno kele na lukengolo na kati ya Menga ya Yesu Klisto tii na kilumbu ya mpulusu ya beno. Mpika, beno tala yawu na Exode, mpe beno tala kana ya kele ve misiku ya Levi. Mu zola kutuba, na Lévitique, kumona kana ya kele ve misiku. Mpika, mbala mosi ba me vulusa, ba lenda tekisa yandi diaka ve samu na mpika. Ya kieleka.

¹⁹⁷ Oh, mu kele na kyese mingi! Mu ke na kiesa mingi na kuzaba ti Tata Mukudi ya beto, ti Nzambi ya Mazulu, Yina vwandaka Mpeve, kulumukaka na ntoto mpe kumaka nsuni; kumaka mutindu mu kele, kukuma mutindu beno kele; mpe bakaka nzutu ya nsuni ya masumu, na kuzabaka disumu ve, ti masumu ya beto lendaka pema na zulu ya Yandi; mpe me kuma mpangi ya beto, me sala kimbangi na ntwala ya bantu nionso ya kufwa, na kufutaka ntalu nionso.

¹⁹⁸ Mpe Mpeve ya Nzambi pesaka kimbangi. Ba pasulaka tempelo, vwale, kubanda zulu tii na yisi. Ve kubanda yisi na zulu, kasi kubanda zulu na yisi; lakisaka ti ya vwandaka Nzambi, Yandi mosi, pasulaka yawu, kubanda Zulu. Pasulaka yawu kubanda zulu na yisi, mpe zibulaka nzila. Mpe matadi ya munkayulu me vutuka, nzasi me sabuka na kati ya mpimpa, matuti na kati ya kudasuka. Mwini dindaka na kati-kati ya kilumbu. Bambwetete mangaka na kusema. Mpe nyonso pesaka kimbangi, “Beto kele ya kuvulusa.” Alleluia!

Beto sambila. [Mpangi mosi ya bakala ke na kupesa profesi—Mu.]

¹⁹⁹ Na bayintu ya beno ya kukulumusa ntangu yayi, kaka mwa ntangu fyoti. Yina vwandaka kuzonza ya profesi, na kubokilaka dibuundu, na manima ya Nsangu.

²⁰⁰ Ntangu yayi kana ya kele na bayankaka awa yina zaba Yandi ve, baluzingu ya beno kele mbote ve, ba me bokila beno ntangu yayi na kutelama awa na ntwala ya nkonga ya bantu yayi, na ntwala ya Nzambi, samu na kundima Yandi mutindu Mvulusi ya beno. Maza kele na kati ya kiziba samu na mbotika. Kana muntu mosi ke vingila na kubanda lukutakanu ya mbotika, ntama mingi ve.

²⁰¹ Na yina beto kele na bayintu ya beto ya kukulumusa, beto ke baka ntangu yayi na nzila ya kuyimba *Mu Ke Sabuka*, na bayintu ya beno ya kukulumusa ntangu yayi.

Mu ke sabuka, yinga, mu ke sabuka,
 Mu ke futa ntalu nyonso yina bayankaka ke
 sala,
 Mu ke tambula na mwa bantu ya kiadi ya
 Mfumu,
 Mu bandaka na Yesu, mpe mu ke kwenda na
 ntwala.
 Mu ke sabuka, yinga, mu ke sabuka,
 mu ke . . .

Beno zola kieleka kutuba yawu ntangu yayi? Kana beno sala yawu, beno kwisa awa mpe beno telama.

. . . ya lenda vwanda nyonso yankaka ke sala,
 mu ke baka nzila . . .

Beno me kubama na kunwana?

. . . ya Mfumu . . .

Mutindu Naomi ya kiboba?

Mu bandaka na Yesu, mpe mu ke kwenda na
 ntwala.

Na kidikulu ya Bethlehem kwisaka Nzenza,
 Na zulu ya ntoto mu zola kuvwanda mutindu
 Yandi;

Na nzietelo nionso ya luzingu kubanda na
ntoto tii na Nkembo
Mu ke lomba kaka na kuvwanda mutindu
Yandi.

Kuvwanda mutindu Yesu . . .

Beno zola kuvwanda mutindu Mukudi ya beno?

. . . mutindu Yesu,
Na zulu ya ntoto mu zola kuvwanda mutindu
Yandi;

Na nzietelo nionso ya luzingu kubanda na
ntoto tii na Nkembo
Mu ke lomba kaka na kuvwanda mutindu
Yandi.

Lezima na zulu ya munu, Mfumu, lezima na
zulu ya munu,
Bika ti Nsemo ya yinzo ya Nsemo kusema na
zulu ya munu;
Lezima na zulu ya munu, Mfumu, lezima na
zulu ya munu,
Bika ti Nsemo ya yinzo ya Nsemo kusema na
zulu ya munu.

Kuvwanda mutindu . . .

Ya vwandaka na muntu yankaka yina beno ke zola
kuvwanda mutindu yina, na ngaanda ya Yandi? Muntu yankaka
ve ke kwisa ntangu yayi mpe ke fukama awa na ntwenya ya kento
yayi, mutindu yandi me fukama? Na kubakaka, mutindu Ruth ya
ntama, na kubakaka nzila ya yandi na suka yayi.

. . . mutindu Yandi;
Nzila nyonso . . . ntoto na Nkembo,
Mu ke lomba kaka na kuvwanda mutindu
Yandi.

Kaka kuvwanda mutindu Yesu . . .

Muntu yankaka kwisa ntangu yayi. Kwisa awa mpe fukama,
mutindu mama yayi me kuma awa. Beno me banda? Beno ke tula
maboko ya beno na Yandi?

. . . Mu zola kuvwanda mutindu Yandi;
Na nzietelo nionso ya luzingu kubanda na
ntoto tii na Nkembo,
Mu ke lomba kaka na kuvwanda mutindu
Yandi.

[Mpangi Branham ke niunguta *Kuvwanda Mutindu Yandi*—
Mu.]

²⁰² Tata ya beto ya Mazulu, na yina dibuundu ke na kuniunguta
nkunga yayi, “kuvwanda mutindu Yesu,” kento yayi, na suka
yayi, yandi basikaka kuna, mutindu Ruth. Ina Bell, ke kwiza

mutindu Ruth ya ntama. Ata yina ntalu kele, yandi me kwiza samu na kufuta yawu. Ata yina . . . wapi mutindu ba fwana seka yandi, to ba ke vweza yandi, yandi ke na kubaka kisika ntangu yayi, ya kutelama awa, ke funguna masumu ya yandi. Kufukama, kutula kidimbu kisika Mfumu ya nene ya kuyonzika lalaka na kulunsi. Mpe kuna sama na kuzwa Mpeve ya Yandi, lemvo ya Yandi yina zonzaka na yandi mutindu Ndinga basikaka, mutindu Naomi ya ntama, vwandaka twadisa. Mpe Yawu bulaka kisika mosi ya mbote, kisika ya kieleka. Mpe ntangu yayi yandi ke kwiza samu na kubaka kisika ya mukwikidi, yandi ke fukama na kulunsi, kuna kisika yandi ke funguna masumu ya yandi, ke tula na lweka bima nyonso ya ntama ya luzingu, mpe ke kuma kivangu ya malu-malu na Klisto Yesu.

²⁰³ Beto ke sambila, Tata, na suka yayi, ti konso muntu ya nzenza na kati ya yinzo ya nene yayi, konso bakala, kento, mwana-bakala, to mwana-kento, yina me zaba Nge ve, kubika ve Bandinga yayi kuluta, Mfumu. Beto zaba kaka ve wapi ngunga beto ke kota na Lufundusu. Ya lendaka vwanda dyaka bubu yayi ti mingi ya beto fwana kwiza. Ya lendaka vwanda ti ntete beto vutuka na yinzo, kisumbula ke salama. Bika . . . Ntima kangamaka na beto. Beto zaba ve. O Nzambi, ti beto kubama, ngunga yayi, na ntangu yina Mpeve kele awa, na ntangu yina beto kele na kimbangi ti Yandi kele awa, na yina Nzambi ya Mazulu, na kyadi ya Yandi nyonso ya seko, kele awa samu na kunata beto.

²⁰⁴ Pesa beto lemvo ya Nge, Mfumu. Fidisa bayankaka, na suka yayi, na autel, mpe ndima Klisto mutindu Mvulusi, mutindu kento yayi ke na kusalaka ntangu yayi. Pesa yawu, Mfumu. Lemvokila yandi, na kuzabaka ti bantu ya yandi . . . Mpangi ya yandi ya bakala kele ya kuvwanda awa na estrade na munu. Mpangi ya yandi ya kento, Wood, ya kuvwanda na manima kuna; mama mpe papa ya kuvwanda awa. Mfumu Nzambi, mu ke sambila samu na kyadi. Pesa yawu, Mfumu. Nge zaba yina mu zola kutuba na kati ya ntima ya munu. Mu ke lombi ti Menga ya Nge kubasika, na kyadi, ke kwiza ntangu yayi na ngunga yayi. Pesa yawu, Mfumu. Pesa, na yina beto ke vingila bayankaka, ti bayankaka kukwiza, mpe, Tata, mpe kuvutula ngwisani na Nzambi na nzila ya Klisto.

²⁰⁵ Mpe ntangu yayi, na yina beto ke na kovingila ntangu yayi mpe ke kukiyufula, beto ke yimbila diaka.

Lezima na zulu ya munu, Mfumu, lezima na zulu ya munu.

Bika ti Nsemo yina ya yinzo ya Nsemo kusema na zulu ya munu.

Mbote mingi. Yinga.

Lezima na zulu . . .

Ya ke vwanda na yankaka yina ke kwiza?

. . . lezima na zulu ya munu,
 Bika ti Nsemo ya yinzo ya Nsemo kusema na
 zulu ya munu;
 Lezima na zulu ya munu, Mfumu, lezima na
 zulu ya munu,
 Bika ti Nsemo ya Nge na yinzo ya Nsemo,
 kusema na . . .

Yinki Yawu ke sala munu?

Kuvwanda mutindu Yesu, kuvwanda mutindu
 Yesu,
 Na zulu ya ntoto mu zola kuvwanda mutindu
 Yandi;
 Na nzietelo nionso ya luzingu kubanda na
 ntoto tii na Nkembo
 Mu ke lomba kaka na kuvwanda mutindu
 Yandi.

²⁰⁶ Tata Nzambi, yina kele kieleka kimbangi ya beto. Mfumu, beto zola vwanda mutindu Yandi, ya lembami mpe ya yisi, ya kukikulumusa, ya lembami, ntangu nyonso na kulemvokilaka bayina ke niokula Yandi mpe ke sala yimbi. Beto—beto zola vwanda mutindu yina. Beto ke tonda Nge samu na kento yayi yina kwisaka na suka yayi. Wapi mutindu beto me zaba yina luzingu yayi ke kwisa, na manima ya mwa ntangu fioti? Mu banza na nzila ya bafoti ya yandi nionso mpe bima nionso na luzingu, mutindu beto nionso salaka, na kumonaka bawu ya kudinda na yisi ya kifuluka ya maza na suka yayi. Mu ke sambila, Nzambi, ti kento yayi ke zinga luzingu ya busantu yina ke twadisa bankundi ya yandi nionso na nzingulu yayi. Bika yandi telema awa ve, kasi kwenda na yinsi ya nsilulu, kutula kidimbu na kisika mpe kulala kuna, kuzwa Mpeve-Santu kuna. Pesa yawu, Mfumu.

²⁰⁷ Kana ya kele na yankaka awa, Tata, yina zolaka kwiza, mpe ve, ti Mpeve ya Nge kubika bawu ve. Bika ti bawu pema ve, kilumbu to mpimpa, tii kuna bawu ke kwiza, mpe, kubaka lukanu mosi yayi. Ve samu na kuvwanda swi, Mfumu, kasi, O Nzambi, na kuzabaka yina bawu ke na kukondwaka. Kuzaba yina ke vwanda na Kilumbu yina, samu na kuwa Yandi kutuba, “Beno kwenda ntama na Munu, beno bisadi ya disumu ya nku. Na suka yina, na Bala-bala Nana mpe na Bala-bala ya Penn, mu bokilaka nge, mpe nge kwisaka ve.” O Nzambi, wapi ngunga ya boma ya ke vwanda samu na bawu, ntangu ba me tula beto na kitezolo mpe ba me mona beto mpamba. Tata, pesa ti yina ke kwisa ata fioti ve na muntu mosi na Mvwandulu ya Kinzambi. Bika bawu nionso kuzwa mpulusu. Beto ke lomba yawu na Nkumbu ya Yesu. Amen.

²⁰⁸ Beto zola kutonda Mfumu, na suka yayi, samu na bumbote mpe lutondo ya Yandi. Mu ke tonda beno nyonso samu na

mvibudulu ya beno, na kuingilaka na munu ntangu ya yinda.

Mpangi-kento Ina Bell. Mu...Mpangi-kento Wood, yina kele mpangi ya nge ya kento, Mpangi Charlie. Yina ba vwandaka sambila, mpe yina beto sambilaka, kubanda ntama. Mpangi-kento Ina Bell, nge lenda telema, na mwa ntangu fioti? Yina ke Mpangi-kento Wood...Administrateur ya beto awa na dibuundu, yina kele bokilo ya yandi ya kento, yina me ndimama Yesu mutindu Mvulusi ya yandi mosi na suka yayi. Mpe bisambu yikwa vwandaka...Nzambi sakumuna nge, Mpangi-kento Ina Bell. Mu banza ti mu ke na nkumbu ya nge mbote. Ya kieleka? Bika ti Nzambi sakumuna nge, mpangi-kento ya luzolo. Mpe kana beno me bakaka ntete ve mbotika na Nkumbu ya Yesu Klisto, mu ndimisa beno na kusala yawu, mpe kuzwa Mpeve-Santu.

²⁰⁹ Nzambi vwanda na beno, sakumuna bakala ya beno ya ntalu kuna. Mu kutanaka na yandi, mwa bilumbu me luta. Kana mu me zimbana ve, nkumbu ya yandi kele Stanley. Ya kele kieleka? Stanley. Nzambi sakumuna nge, Stanley. Yinzo kele mbote, kasi mu ke kwikila ti ya ke vwanda kitoko ntangu yayi kulutila ntangu nyonso. Nzambi vwanda na beno nyonso, mpe—mpe pesa beno lemvo ya Yandi mpe kyadi, bilumbu nyonso ya luzingu ya beno. Mpe beno landa na Mfumu. Beno vwanda mutindu Ruth ntangu yayi, Ina Bell, beno kwenda na ntuala na Yawu. Beno landila kaka na kukwenda na ntuala. Bantangu yankaka ya ke kuma mpasi, mpe banzila ke zimbana. Kasi, beno bambuka moyo, beno tala kaka na yisi ya ntoto, mpe na manima beno tala na zulu, beno ke mona bitambi ya Menga ke landa nzila nyonso kuna. Yandi ke twadisa nzila.

²¹⁰ Ntangu yayi, oh, ya kele yimeni midi, ngunga kumi na zole. Beno zola dyaka kuvwanda na ndonga ya bisambu? [Dibuundu me tuba, “Amen.”—Mu.]

²¹¹ Billy, wapi kisika, wapi mutindu...? Yandi kabulaka bakalati ya bisambu? Mu—mu ata mbala mosi ve...Mu banza ti yandi tubaka na munu ti yandi kabulaka kisambu...Mbote, yinki ya vwandaka? Muntu mosi ke tuba na munu yina mukanda mpe bantalu vwandaka. [Mpangi mosi ya bakala me tuba, “Yandi yayi me kwisa.”—Mu.] Yinki? [Mpangi Billy Paul me tuba, “B.”] B. B, mosi na nkama mosi? Makumi tanu na nkama mosi. Mbote mingi. B, nimelo ya ntete. Bawu kuzwaka...

²¹² Ntangu yayi, beto kele na nkonga ya bantu, na yawu beto lenda ve...Beto ke kuzwa bawu nyonso ya kutelama, mpe beto ke lutisa kaka bawu, na yina mu ke sambila samu na bawu.

²¹³ Ntangu yayi, bantu yikwa me monaka ntete ve mosi ya bandonga ya bisambu? Beto tala maboko ya beno, mu me vwandaka ata fioti ve na mosi ya balukutakanu ya munu, samu na ndonga ya bisambu. Oh, la la! Mingi kati ya beno.

²¹⁴ Mbote, ntangu yayi, beto lenda sambila kaka samu na bantu, to beto lenda kuzwa kuswasikisa mabanza, to kuvwanda ve na ndonga ya bisambu ata fioti ve; ba ke bokila bawu kaka, na kati ya kivinga. Ya ke diambu ve. Mpeve-Santu keke awa. Yinga, tata. Kasi beto vwanda ya kutelama ndonga ya bisambu.

Nimelo ya ntete, nani keke na nimelo ya ntete, kalati ya bisambu B? A- . . . Makumi tanu. Beno lemvokila munu. Muntu ve keke na mosi, ya kieleka. Mbote mingi. Kalati ya bisambu makumi tanu, nani keke na yawu? Kwisa awa, tata. Kalati ya bisambu zole. . .

Makumi tanu na mosi, makumi tanu na zole. Kalati ya bisambu makumi tanu na zole. Mbote mingi. Makumi tanu na tatu. Makumi tanu na tatu. Mbote mingi. Makumi tanu na yiya.

Beno kwiza nzila yayi, kaka *awa*. Kana beno keke na manima, beno kwiza na lweka yayi, *awa*.

Makumi tanu na mosi, makumi tanu na zole, makumi tanu na tatu, makumi tanu na yiya. Nani keke na makumi tanu na tanu, kalati ya bisambu makumi tanu na tanu? Mama, kaka *awa*. Kalati ya bisambu makumi tanu na sambanu.

Telama, na lweka ya kibaka, *kuna*, kana nge zola.

Makumi tanu na sambwadi, makumi tanu na nana, makumi tanu na yivwa, makumi sambanu. Makumi sambanu na mosi, makumi sambanu na zole, makumi sambanu na tatu, makumi sambanu na yiya, makumi sambanu na tanu.

Busty, luta kaka lweka yango kuna, mpangi, kaka *kuna*. Mbote mingi. Luta kaka.

Bantu yikwa keke ve na kalati ya bisambu, mpe beno zola Mfumu kubelusa beno? Beno telemisa diboko ya beno. Mbote mingi. Ya keke nyonso yina beno fwana sala, beno kwikila kaka yawu ntangu yayi. Beno kwikila kaka. Mbote mingi.

Makumi tanu na sambanu. Mu kuzwaka yawu? Makumi tanu na sambwadi, makumi tanu na nana, makumi tanu na yivwa, makumi sambanu. Bikwa bawu kutelama.

Makumi sambanu na mosi, -zole, -tatu, -yiya, -tanu. Bikwa bawu kutelama. Makumi sambanu na sambanu, makumi sambanu na sambwadi, makumi sambanu na nana, makumi sambanu na yivwa, makumi sambwadi. Bikwa bawu telema.

Mu zola ve ti bawu nionso kukwisa na mbala mosi, yawu yina mu ke bokila nimelo, tii na makumi sambwadi.

Makumi sambwadi na makumi nana, beno telama. Beno kwisa awa, na lweka *yayi*, makumi sambwadi tii na makumi nana. Mbote mingi. Mosi, zole, tatu, yiya, tanu, sambanu, sambwadi, nana, yivwa. Mbote mingi.

Makumi nana na yivwa, beno telama *awa*. Doc, nge sadisa bawu kuna na manima, kana nge zola. Makumi nana na makumi yivwa, beno telama na lweka *yayi*.

Makumi yivwa na nkama mosi, me telama na lweka *yayi*, *awa*. Mbote mingi.

²¹⁵ Na yina ba ke vwanda na ndonga, mu ke zola kuyufula dibuundu kima mosi. Banzenza yikwa kele awa, ata fioti ve na mosi ya balukutakanu ya munu? Yikwa na kati ya beno? Bantu yikwa zaba ti ya kele ve na muntu yina lenda belusa yankaka, ata na dokotolo ve? Ve, tata. Dokotolo kele munganga ve. Yandi kele kaka nkadulu ya bisadi. Nzambi kele munganga. Beno me mona? Dokotolo lenda tula diboko, kasi yandi lenda belusa diboko ve. Dokotolo lenda katula makulu, kasi kubelusa ve kisika yina yandi zengaka. Dokotolo lenda katula dinu, kasi kukanga ve kubasika ya menga, to kubelusa yawu. Nzambi fwana sala yawu. Mbote mingi.

²¹⁶ Bantu yikwa zaba yawu, ntangu Yesu vwandaka awa na zulu ya ntoto, ti Yandi tubaka ve ti yandi kele munganga? Yandi vwandaka Muntu. Yandi tubaka, “Munu ve yina ke salaka bisalu, kasi Tata ya Munu yina ke zingaka na kati ya Munu, Yandi ke salaka bisalu.” Ya kieleka? Bantu yikwa zaba, ntangu Yandi vwandaka awa, yinki, mutindu. . . Wapi mutindu ya ministele Yandi kuzwaka ntangu Yandi vwandaka awa? Yandi salaka yina Tata lakisaka Yandi na kusala. Ya kele kieleka? [“Amen.”] Bantu yikwa zaba, zaba yawu? Santu Jean 5:19, Yandi tubaka, “Ya kieleka, ya kieleka, mu ke tuba na beno, Mwana lenda sala kima mosi ve na Yandi mosi, kasi yina Yandi ke mona Tata ke sala.” Ya kieleka? [“Amen.”] “Yina ke sala Mwana, mutindu mosi.”

²¹⁷ Ntangu *yayi*, na yina, Yesu Klisto kele mutindu mosi mazono, bubu *yayi*, mpe kukonda nsuka? [Dibuundu me tuba, “Amen.”—Mu.] Nge ke kwikila yawu, na ntima ya nge ya muvimba? [“Amen.”] Yandi kele mutindu mosi mazono mpe kukonda nsuka. Beno ke kwikila, ti, Yesu Klisto kele mutindu mosi mazono mpe kukonda nsuka, yina zola kutuba ti Yandi kele kieleka mutindu mosi? [“Amen.”] Mbote mingi.

²¹⁸ Wapi mutindu Yandi kele mutindu mosi? Mutindu mosi na konso musiku. Ya kele kieleka? Yandi kele Nzambi mosi, Munganga mosi, Mvulusi mosi. Yandi kele mutindu mosi, nkadulu mosi. Ya kele nyonso mutindu mosi. Ya kele kieleka? Mutindu mosi. Mbote mingi. Na yina, kana Yandi vwandaka mutindu mosi, mpe kele mutindu mosi, Yandi ke sala mpe ke sala mutindu mosi. Ya kele kieleka? Ntangu *yayi*, bantu yikwa zaba ti ya kele Kieleka?

²¹⁹ Mu ke baka kaka mwa ntangu fioti awa. Mu ke vingila. Ya ke monana ve, samu na munu, mutindu bantu makumi tanu me telema kuna. (Mosi, zole, tatu, yiya, tanu, sambanu, sambwadi, nana, yivwa, kumi, kumi na mosi, kumi na zole, kumi na tatu,

kumi na yiya.) Ve. Bayankaka na kati ya bawu vutukaka na yinzo, na malu-malu. Mu monaka bantu yankaka kukwenda kuna. Mbote mingi, kaka mwa nzila yayi, ya nkufi. Bantu yikwa ke zola kuzwa yayi? Banzenza yikwa na munu, na ndonga yina? Telemisa diboko ya nge, zaba ti mu zaba kima mosi ve samu na nge. Telemisa diboko ya munu . . . diboko ya nge.

²²⁰ Bantu yikwa kuna, banzenza, zaba ti mu zaba kima mosi ve samu na nge? Telemisa diboko ya nge, ti nge kele mbevo. Mbote mingi. Bantu yikwa ke zola kumona ndonga ya kuswasikisa mabanza, na yina beto lenda sala nswalu mpe kuluta? [Dibuundu me tuba, “Amen.”—Mu.] Beno ke zola . . .? Ntangu yayi, ya ke diambu ve. Mu lenda sambila kaka samu na bawu, kunata bawu na ndonga. To, bawu lenda vwanda, ke kwenda kaka mpe ke vwanda. Ya ke diambu ve. Mpeve-Santu lenda swasikisa yawu, kaka mutindu mosi. Beno ke kwikila yawu?

²²¹ Ntangu yayi, na yina, kana ya kele mutindu yina, na yina beno vwanda kaka swi, na mwa ntangu fioti. Ntangu me luta fioti, na yina beno bikana kaka swi, na mwa ntangu fioti. Mu zola kuyufula beno kima mosi ntangu yayi.

²²² Mu lendaka vwanda na micro ya yimbi awa. Bawu zole mbote? Bawu zole vwandaka ya kukangama, mbote mingi, *yayi* mpe? [Mpangi-bakala mosi me tuba, “Yinga.”—Mu.] Mbote mingi.

²²³ Ntangu yayi, beno vwanda kaka swi, mwa ntangu fyoti. Mu ke tala na yisi na nzila yayi, mona kana mu zaba muntu mosi.

²²⁴ Mu zaba ti muntu yayi me telama kaka *kuna*. Ntangu yayi, mu zaba Earl. Earl, mu zaba nge, Earl Colvin. [Mpangi Earl Colvin me tuba, “Mu kele ve na ndonga ya bisambu, ata ti, Mpangi Bill. Mu me nata nkundi ya beto na Jeffersontown.”—Mu.] Oh, yinga, yinga, bakala yayi awa. Ya kele ti muntu yina beto vwandaka sosa, kuna na Colorado? [“Mu banza ti nge ke zaba beto ve, beto me zimbisa kizitu mingi.”] Oh, la la! Ya kieleka ve. Mu ke kwikila ti Earl tubaka na munu ti nge ke mbevo, mpe nge me kwisa. Ntangu yayi, kana beno lenda ve kutelama ntangu ya yinda, ti muntu mosi kubaka yandi kiti kuna. To, bayankaka ya bawu—bayankaka ya bawu ke telama mpe ke pesa yandi kiti kaka kuna pene-pene, ya ke vwanda mbote, samu ti bakala yango kele kieleka, ya kubela mingi. Oh! Yandi me zimbisa bakilo makumi tatu to kulutila, na kilo. Mpe—mpe yandi—yandi kele kieleka, kieleka ya kubela. Ntangu yayi beno bika kaka yandi kuvwanda kuna. Beno banda na kutonda Yandi, kuna, mpangi-bakala.

²²⁵ Ntangu yayi bika mu tala na yisi. Ntangu yayi, Earl vwandaka kaka ya kutelama na yandi. Ntangu yayi, bakala *yayi*, ya kutelema kuna na manima, yandi ke na kutalaka munu, yandi me katuka kuna na ziunga ya La—LaGrange, Kentucky. Mu zaba ve nkumbu ya yandi, kasi mu—mu—mu zaba nge.

Mpe ya kele Mpangi-bakala mpe Mpangi-kento Kidd kuna. Mu zaba bawu. Mpe mama yayi, kieleka . . . Ya kele Mpangi-kento Rook? To . . . [Mpangi-bakala Neville me tuba, “Mpangi-kento Hardy.” Mpangi-kento mosi me tuba, “Mu kele Mpangi-kento Taylor . . . ? . . . na Hattie.”—Mu.] Na kento yayi awa, yina me katuka na Sellersburg, mu banza, ya kele mpofo. Ya kele kieleka? Mbote mingi.

²²⁶ Mu banza ti ya kele nyonso, na mulonga, ti kieleka mu zaba. Oh, yinga, yayi kele nkundi ya munu ya mbote, Busty Rogers, awa, katuka Milltown. Mpe kuna na ndonga, mu banza ti bayankaka kele banzenza samu na munu. Ntangu yayi, yina kele na ntwala ya Nzambi, mutindu mu zaba, bawu kele banzenza samu na munu.

²²⁷ Ntangu yayi bika mu mona na kati ya kivinga. Ntangu yayi, beno—beno bayina kele banzenza samu na munu, yina kele mbevo, beno telemisa diboko ya beno, mpe, beno zaba, beno kele na ndombolo na ntima ya beno. Beno telemisa diboko ya beno, kisika nyonso beno kele. Yina zaba munu . . . Mbote mingi. Ok. Ya kele kaka mfumu ya basoda, bisika nyonso, bisika nyonso.

²²⁸ Ntangu yayi, ntangu yayi, ya ke nyongisa beno ve, kaka samu na kvingila mwa ntangu fyoti to zole dyaka. Mu zola kuyufula beno kyuvu mosi ya mfunu. Mu ke sala mbote na kuvutuka awa, samu beno kuwa munu. Mu zola yufula beno kima mosi. Ntangu yayi, Bansangu yayi yina mu ke longaka, beno ke kwikila ti ya kele Kieleka? [Dibuundu me tuba, “Amen.”—Mu.] Beno, kieleka, beno zolaka kwiza awa ve kana ya vwandaka ve.

²²⁹ Ntangu yayi, Nzambi ke sala kima mutindu yina kukondwa kupesa munu dibanza mosi na yina mu vwandaka sala? Kieleka yandi zolaka ve. Kieleka, Yandi zolaka ve. Ntangu yayi, kana Yandi salaka yawu . . .

²³⁰ Ntangu yayi, mu ke tuba ti Yesu Klisto me sobaka ve. Lufwa ya yandi sobaka Yandi ve; ya kembisa Yandi. Mpe Yandi telamaka, na kilumbu ya tatu, mpe zangukaka na Zulu. Mpe Yandi fidisaka Mpeve-Santu, yina vwandaka Nzambi, kele Mpeve-Santu yina vwandaka na zulu ya Yandi. Beno nionso ke kwikila yawu? Mpe Yesu, ntangu Yandi vwandaka awa na zulu ya ntoto, Yandi tubaka, “Bisalu yina Mu ke sala, beno mpe ke sala yawu. Na mwa ntangu fioti, mpe *yinza* ke mona Munu diaka ve.” Yina kele ntumunu ya yinza, beno zaba, kaka dibuundu ya kukondwa lukwikilu mpe nionso yina. “Ba ke mona Munu diaka ve. Kasi, beno ke mona Munu.” “Beni,” ya kele Dibuundu, mukwikidi. “Samu ti mu . . .” Mu kele kiyingilu ya muntu. “Mu ke vwanda na beno, ata mpe na kati ya beno, tii na nsuka ya yinza.” Mpe Grec ya kele na *nsuka*, yina zola kutuba, “nsuka ya yinza.” “Vwanda na beno tii na nsuka ya yinza. Mpe bisalu yina Mu ke sala beno mpe ke sala yawu.” Ya kele Kieleka?

²³¹ Ntangu yayi, beto kele na ba-Baptiste, ba-Methodiste, ba-Protestant, mpe ba-Catholique, mpe—mpe ba-Juif, yina me vwanda awa na suka yayi. Mpe beto kele na Dibundu ya Nzambi, ba-Nazaréen, ba-Pèlerin de la Sainteté, ba-Témoin de Jéhovah, ba-denomination nionso yayi ya luswaswanu vwandaka talisa. Mu ke tala bisika nionso, mu ke na kutala bawu. Ba-Méthodiste, ba-Luthérien, ba-Pentecotiste, mitindu nyonso, mutindu mu ke tala bisika nyonso, ke mona bantu yina mu zaba. Mpe bawu nyonso kele banzenza na ngaanda ya mbanza. Branham Tabernacle kele mwa kima ya fyoti, awa na—na mbanza, kasi ya ke sala na yinza.

²³² Ntangu yayi, beto baka kaka yayi, mpe beno banza mbote-mbote, beno banza, kulonguka, beno vwanda na luzitu, mpe beto yufula kiuvu yayi. Na ntangu yina, kana Yandi kele ya kufwa ve, na yina nkadulu ya Yandi na ntwala ya beno mpe na ntwala ya bambevo ke vwanda kaka mutindu mosi bubu yayi mutindu ya vwandaka mazono. Na yina wapi mutindu Yandi salaka nkadulu ya Yandi mazono? Yayi, “Mu lenda, kana beno ke kwikila.” Ya kele kieleka? “Kana beno ke kwikila.”

²³³ Muntu yango tubaka, “Mfumu, vwanda na kyadi na beto.” Yandi tubaka, “Mwana ya munu ya bakala kele ya kukwamisa mingi na dyabulu. Mu nataka yandi na bilandi ya nge, mpe ba vwandaka boka mpe vwandaka boka, mpe bima nionso yina.”

²³⁴ Yandi tubaka, “Mu lenda, kana nge ke kwikila. Kana nge ke kwikila, mu lenda.”

²³⁵ Ntangu yayi beno tala. Wapi mutindu Yesu salaka? Yinki Yandi vwandaka, mazono? Wapi mutindu Yandi vwandaka longi? Ntangu yayi, yayi kele nzenza ntangu yayi, mu ke tuba. Beto mona yina Yandi vwandaka, mazono. Beno baka munu kaka pene ya baminuti tatu, beto ke tanga, mwa bisika zole.

²³⁶ Ntangu ministere ya Yandi bandaka ntete, ya vwandaka na muntu mosi na nkumbu ya André, mulobi mbisi, ndimaka, kwikilaka na Yandi, mpe kwendaka mpe bakaka mpangi ya yandi ya bakala, na nkumbu ya Simon. Beno ke bambuka moyo na yawu? Yandi nataka yandi na Yesu. Yandi vwandaka mulobi yina me longukaka ve, yandi lendaka ve kusonika nkumbu ya yandi mosi. Mpe yandi kwisaka na ntwala ya Yesu. Mpe Yesu talaka yandi, mpe tubaka, “Nkumbu ya nge kele Simon. Nge kele mwana ya Jonas.”

²³⁷ Bantu yikwa zaba ti ya kele Masonuku? Ba zabaka ti ya vwandaka Mesiya, samu ti Yandi kele. . . Nzambi silaka. Moise silaka, ti, ntangu Mesiya kwisaka, Yandi ke vwanda Profete. Ya kieleka? Mesiya-Profete. Mpe Yandi talaka, mpe Yandi tubaka, “Nkumbu ya nge kele Simon.” Mpe yandi tubaka, “Tata ya nge vwandaka na nkumbu ya Jonas.” Mpe yandi zabaka ti yina vwandaka Mesiya.

238 Kento yina na dibulu ya maza, yina kele yinsi yankaka ya bantu. Ntangu yayi, kaka ba-Juif mpe ba-Samaritain yambaka Yandi. Bantu ya makanda, beto kotaka ntete ve, kimvuka ya Ruth. Ntangu yayi, kento yina na dibulu ya masa, yina vwandaka Samaritain, yandi kwisaka baka masa. Yesu tubaka, “Natina Munu masa ya kunwa.” Yinki Yandi salaka? Yandi tubaka na yandi, kaka mutindu mu lendaka tuba na muntu mosi kuna na kati ya kivinga. Yandi tubaka, “Natina Munu masa ya kunwa.” Bawu kutanaka ata fioti ve na ntwala.

239 Mpe yandi tubaka, “Kasi, ya kele kikalulu ve, beto kele na nkabwani awa.” Mutindu ya vwandaka na Sude, samu na bankundi ya beto ya ndombe mpe nyonso, kasi bawu kele dyaka na yawu ve. Matondo na Nzambi, samu na yawu. Na yina Yandi tubaka. . . “Beto kele na nkabwani awa. Na yina, ya kele ve kikalulu samu na Nge. Nge kele Juif.” Yesu vwandaka Juif. Yandi vwandaka Samaritaine. Yandi tubaka, “Ya ke kikalulu ve samu—samu Nge yufula munu, kento ya Samarie, mutindu yina.”

240 Yandi tubaka, “Kasi, kento, kana nge zabaka Nani nge vwandaka tuba, nge zolaka lomba Munu masa.”

241 Yina telemisaka kento yina ya kitoko. Mpe yandi talaka na zulu mpe tubaka, “Kasi, Nge kele na kima ve ya kubakila. Dibulu ya maza kele mudindu.”

242 Yandi tubaka, “Bamasa mu ke pesa kele Luzingu ya kukonda nsuka.”

243 Mpe na nsuka Yandi monaka yina vwandaka mpasi ya yandi. Bantu yikwa zaba, banzenza, zaba yina vwandaka mpasi ya yandi? Yandi vwandaka na babakala tanu. Na yina yinki Yandi tubaka na yandi? Yandi tubaka, “Kwenda, baka bakala ya nge mpe kwisa awa.”

244 Yandi talaka Yandi. Yandi tubaka, “Mu ke na bakala mosi ve.”

245 Yandi tubaka, “Nge tubaka mbote, samu ti nge vwandaka na tanu, mpe yina nge ke na kuzingila ntangu yayi kele ve bakala ya nge.”

246 Yandi tubaka, “Tata, mu ke mona ti Nge kele profete. Ntangu yayi, beto zaba, ntangu Mesiya ke kwiza,” (Ya kele Yesu.) “ntangu Mesiya ke kwiza, Yandi ke tuba na beto bima yayi, samu ti beto zaba ti Yandi ke vwanda Profete yina. Beto zaba ntangu Mesiya ke kwisa, Yandi ke sala yayi. Kasi Nani Nge kele?”

Yandi tubaka, “Mu kele Yandi.”

247 Mpe na zulu ya yawu, yandi kotaka na mbanza mpe tubaka, “Benö kwiza, mona Muntu, Yina tubaka na munu yina mu salaka: Yayi kele ve Mesiya ya kieleka?”

248 Kana yina vwandaka kidimbu ya Mesiya mazono, mpe Yandi kele mutindu mosi bubu yayi, ya kele kima mutindu mosi bubu

yayi. Ntangu yayi, beno banzenza ke kwikilaka yawu? Ntangu yayi, ya kele samu na beno na ndonga *awa*.

²⁴⁹ Ntangu yayi, samu na bawu kuna, kaka Disonuku mosi, samu ti beno kuzwa kima ya kutelama kuna. Bantu yikwa ke kwikila ti Yandi kele Nganga-Nzambi ya Ntete ntangu yayi, yina lenda simbama na bansatu ya bimbevo ya beto? Beto nionso . . . [Kisika ya mpamba na bande—Mu.] . . . ? . . .

Tata ya Mazulu, Yina zaba munu, zaba, na mutindu mu zaba, mu me monaka ntete ve muntu yayi. Ntangu yayi yandi lendaka mona munu mpe mu lendaka mona yandi, kasi kana ya kele mu zaba kima mosi ve samu na yawu. Samu ti, mu vwandaka na yinza ya muvimba, bambala, mu vwandaka sambila samu na bambevo mpe nyonso, mpe mu—mu lendaka kutana na yandi kisika mosi kuna, to mu monaka yandi, to kima mosi, mu zaba ve. Kasi na mutindu nyonso, mu—mu zaba kima mosi ve samu na yandi. Ya kele kieleka. Ya kele kieleka, tata? Kaka samu bantu kuzaba. Beno me mona? Mbote mingi. Ntangu yayi, bakala yayi me telama awa samu na dyambu mosi. Ntangu yayi wapi mpangi yina kele muzombi, Efferson, to, ntete- . . . Mbote mingi. Mu zola kaka yandi kumona yawu. Wapi kisika ya kele, wapi kisika kele Busty Rogers? Kaka ya kutelama kuna. Ntangu yayi awa, ntangu yayi Busty, nge zaba munu. Tata Efferson, nge zaba (Ya kele mutindu yina? Efferson? Yinga.) nge zaba munu, beto zombaka kintwadi kuna na Colorado, mu kele—mu kele muntu. [Kisika ya mpamba na bande—Mu.]

²⁵⁰ . . . Muntu ke na kimbevo yina me katuka na kondisyo ya kidi-kidi. Yina kele dyambu ya yandi; samu ti beno kele na prostate (Ya kele kieleka.), beno ke kwenda na nkokila, mpe nyonso yina. Beno me katuka na Ohio. Mpe beno kele ya dibuundu ya Mpangi Sullivan to beno kwenda kuna. Mu ke mona Mpangi Sullivan ya kutelama awa. Nge me kwisa na Kidds; ya kele yina nge salaka. Ya kele kieleka. Mbote mingi, na ntangu yayi nge ke kuwa mutindu yankaka ntangu yayi. Ya me bika nge. Ntangu yayi, beno lenda vutuka na yinzo; lukwikilu ya beno ke belusa beno. Ntangu yayi, Nzambi sakumuna beno.

Ntangu yayi beno ke kwikila?

²⁵¹ Ntangu yayi mu zaba nge ve, tata. Kizizi ya beno ke talaka ya kuzabana samu na munu, kasi ntangu yayi, na yina mu zaba nge ve, Nzambi na Mazulu zaba, mu zaba kima mosi ve samu na nge. Mu zaba ve yina ke tambula mbote ve na beno. Mu ke vwanda ve na mutindu ya kuzaba yina ke tambula mbote ve na beno. Nge kele kaka muntu yina kele ya kutelama kuna. Mpe nge vwandaka na kalati ya bisambu, na . . . ya vwandaka na nimelo na zulu ya yawu. Mpe nge kaka . . . Mwana-bakala yina pesaka nge kalati yina, mpe ba bokilaka nge awa na ndonga ya bisambu.

²⁵² Ntangu yayi, beno tala kaka mutindu ya ke na kupanzana. Beno me mona, kaka na ntangu yina, ya kele mpasi mingi, yina

me sala mingi samu na munu, ti kilumbu mosi, kulutila ntangu nionso mu vwandaka longi na suka yayi. Kima mosi ke basika. Beno me mona? Kima mosi ke basika.

²⁵³ Ntwenya ya bakala, kieleka nge kele awa ve samu na nge mosi. Nge kele awa samu na muntu yankaka, mpe yina kele mwana. Mpe mwana yango kele ve awa; ya kele na yinsi ya plat: Kansas. Yandi ke kubwaka ngambu mutindu épilepsie. Épilepsie kele yina ya kele, ya kele na mpimpa na zulu ya mwana yayi.

²⁵⁴ Beno kele na ngwisani, to, beno kele. . . na Strickers. Beno me kwelana beno nionso na bampangi ya bakento, to kima mosi mutindu yina? Ya kele kieleka. Beno ke kwikila? Na yina yandi ke kuzwa dyaka ve ntangu, kana beno ke kwikila na ntima ya beno ya muvimba. Mutindu beno me kwikila, ya ke vwanda mutindu mosi samu na mwana. Kwenda ntangu yayi mpe kusala na yawu ntembe ve.

Ntangu yayi beno ke kwikila na ntima ya beno ya muvimba? Beno nionso? Beno sambila samu na muntu mosi. Beno sambila mpe beno bika Nzambi kupesa mvutu.

²⁵⁵ Mama yina me vwanda kuna, ke na kusambila samu na tata ya kento, kele na cancer; na kati kuna. Nge ke kwikila na ntima ya nge ya muvimba, kuna na manima, mutindu yina? Mu zaba nge ve. Mu me monaka nge ata fioti ve na luzingu ya munu. Kasi ntangu beno kuwaka munu kutuba na muntu yina ya kima yina yandi vwandaka banza, na dikanda mosi, yina kwisaka na beno. Ntangu yayi, beno ke kwikila na ntima ya beno ya muvimba?

²⁵⁶ Ntangu yayi, yinki yandi simbaka? Mu zola ti bayankaka ya beno bantu, kutuba na munu yina kento yina simbaka. Yandi kele bametele yivwa na munu yandi me simbaka munu ata fioti ve, kasi yandi simbaka Nganga-Nzambi yina ya Mbuta. Beno me mona, Busty? Beno me mona, tata? Yandi simbaka Klisto. Klisto ke kwisa mpe ke tuba na munu yina yandi vwandaka zola, ntangu yayi yandi ke kuzwa yina yandi lombaka.

Kento, mu zaba ve kento yayi. Yandi kele nzenza samu na munu. Ya kieleka? Beto kele banzenza. Mu me monaka yandi ntete ve na luzingu ya munu mutindu mu zaba, kasi Nzambi zaba yandi. Kana Nzambi lenda tuba na munu kima mosi samu na nge mutindu Yandi salaka na kento yina na dibulu ya masa, talisa kima yina kele na kati ya ntima ya nge, beno ke ndima yawu, mpe beno ke kwikila ti ya lendaka vwanda munu ve, mutindu muntu, ke tuba na beno yawu, ya ke—ya ke vwanda Nzambi? Beno ke kwikila yawu?

²⁵⁷ (Ntangu yayi, yayi kele zole, to bantu yikwa kele yayi? Beto me kuzwa ntete tatu? Zole? Zole? Mbote mingi. Mbote mingi.)

²⁵⁸ Mama yayi me fikama na kivudi ya lufwa. Ya kele na kivudi ya ndombe na zulu ya yandi, yina yandi kele na cancer. Ya kele kieleka. Dokotolo ke tuba na beno ti ya kele cancer ya mikanda yina ba me sonika. Ya kele kieleka, telemisa diboko ya beno. Nge

me katuka ntama na awa: Iowa. Nge ke kwikila? Beno ke na, to mwana, to, ya kele mutekolo ya bakala, mpe ya kele na kima ke tambula mbote ve na meso ya yandi, mpe beno ke sambila samu na yandi. Nge ke kwikila ti Nzambi lenda tuba na munu nani nge kele? Mama McKee, na manima vutuka na yinzo ya nge, mpe beluka. Yesu Klisto me belusa nge.

Beno ke kwikila na ntima ya beno ya muvimba ntangu yayi? Mu me monaka ntete ve kento yayi na luzingu ya munu. Yinki ya ke sala?

²⁵⁹ Kaka mwa ntangu fyoti. Buzitu, kaka mwa ntangu fyoti. Mu ke na kutalaka kaka na kento mosi ya ndombe ya kuvwanda awa na manima; mpe Nsemo yina, yina beno ke mona na foto yina, kele ya kunamika na zulu ya kento yina ya kuvwanda kuna na manima. Kwikila ti mu kele profete ya Yandi, mpangi-kento. Nge ke sambila samu na bakala ya nge na kitezo ya lufwa na Lupitalu ya ba-Vétérán; ya kele MUTINDU ME TUBA MFUMU. Kwikila na ntima ya nge ya muvimba ntangu yayi; yandi ke beluka.

Yinki yandi simbaka? Ya kele na kento, kento ya ndombe, bakala ya mundele, mutindu kento yina na dibulu ya maza. Yinki yandi simbaka? Yesu mosi. Yandi kele ve kento mosi, kento ya ndombe vwandaka, to, kento ya Samarie vwandaka; yandi kele kento yankaka. Mu kele ve Yesu, muntu mosi; mu kele muntu yankaka. Kasi yandi kele mukwikidi na zulu ya Yesu Klisto, mutindu kento vwandaka; mpe mu kele mukwikidi mpe kisadi ya Yandi, mpe Mpeve mosi yina ke sala na kilumbu yayi. Klisto kele ya kufwa ve, Yandi kele moyo. Mu me monaka yandi ata fioti ve to mu me zaba yandi na luzingu ya munu. Ntangu yayi, beno me mona, beno ke na kalati ya bisambu ve samu na kuvwanda awa. Beno vwanda kaka na lukwikilu na Nzambi. Ya kele kieleka ve?

²⁶⁰ Ntangu yayi mu zaba kento yina kuna, kasi mu zaba yina yandi ke na kusambilaka: mwana-nkazi yina ya kento. Nge ke kwikila yawu (kuna na sude), kana nge ke kwikila na ntima ya nge ya muvimba, yandi ke beluka.

Yinki samu na nge? Beto kele nzenza mosi na yankaka. Nge kele kaka ntwenya ya bakala. Mu me monaka nge ntete ve na luzingu ya munu. Nge ke kwikila ti Nzambi lenda tuba na munu yina kele mpasi ya nge? Kana Yandi zola, yawu ke sadisa nge? Kieleka.

Ntangu yayi, kaka, beno landila kaka na kukwikila kuna. Beno me mona?

²⁶¹ Mpasi kele na laka ya beno. Beno kuzwaka kisumbula ya tomabilu. Nge me katuka na node. Nge kele pene-pene ya Bedford, na Indiana. Ya kele kieleka. Ya kele kieleka? Na yina beno—beno ke kwikila ti nkingu ya beno ke vwanda mbote? Mutindu beno ke kwikila, ya vwanda mutindu yina samu na beno. Vutuka na yinzo mpe pesa Nzambi lukumu. Beluka.

Wapi faso, tata? Nge ke kwikila ti Nzambi lenda monisa na munu mpasi ya nge? Nge ke na kimbevo ya kidi-kidi; ya me sala ti nge kuzwa kimbevo na misopo, na colon, na misopo. Nge kele kieleka ya Californie. Ya kele kieleka. Nge ke kwikila ti Nzambi zaba nani nge kele? Tata Murray? Mbote mingi, ntangu yayi. Vutuka na yinzo ya nge; kwikila Yandi na ntima ya nge ya muvimba.

Beto kele banzenza mosi na yankaka? Mu zaba nge ve, mpe Nzambi. . . Mu zaba nge ve mpe nge zaba munu ve. Beto kele banzenza, ya kieleka? Kana Nzambi ke monisa na munu kima mosi samu na nge, nge ke kwikila ti mu kele profete ya Yandi?

Bayankaka ya beno ke kwikila? Mu kele. . . Ya ke na kunata munu kieleka, kieleka ya kulemba ntangu yayi, beno me mona. Beno kwikila kaka ntangu yayi. Mu kele kaka. . . Kupakula kele awa. Beno zaba yawu, mutindu yina ve? Beno—beno zaba ti ya—ya kele awa, beno me mona. Mpeve-Santu kele awa ntangu yayi kana beno lenda kaka. . . Mu ke lemba mingi ti mu lenda mona beno diaka ve kuna. Beno me mona? Beno. . . Kana dyambu mosi me sala ti Yesu kulemba, yinki ke sala mambu sambwadi to nana, kumi awa, beto me kuzwa, awa, na kati ya kivinga? Tanu to sambanu to sambwadi awa na estrade na tatu, to yiya, to tanu, kuna. Beno me mona? Ya kele kaka na munu na kisika yina mu lenda mona dyaka ve. Beno tala mutindu bantu nyonso ke kuzwaka kaka miliki mutindu miliki. Kana beno ke bakula kaka ti ya kele kieleka kidimbu ya Mpeve-Santu ke tambula na kati. Ya kele Nsemo yango, kuna, ke tandama na zulu ya kivinga. Beno me mona, Ya kele, Yandi ke na kunataka beno na kati ya kimvuka, na kisika mosi.

Ntangu yayi, na kuvwandaka ti kento yayi me telama awa, samu na beno na ndonga ya bisambu ntangu yayi: Kana Nzambi ke monisa (Awa, mu me telemisa maboko ya munu, mu me monaka ntete ve kento yayi, mu zaba kima mosi ve samu na yandi.), kana Nzambi ke monisa kieleka, bika, yina yandi salaka, to yina yandi kele, to, mbote, kima yankaka samu na yandi, beno nionso ke kwikila, na yina, ti ya kele, Nzambi ke salaka yawu? Beno ke kwikila yawu? Mpe beno lenda—beno lenda ndima? Beno ke kwikila ti beno ke zinga ntangu yayi? Beno lenda. . . Ya kieleka mu zaba mpasi ya nge, mu zaba mpasi ya nge, ya nge, ya me bumbama ve. Beno me mona? Nzambi ke monisa bima yina, kasi kana beno ke kwikila kaka.

Ntangu yayi, mu ke luta mpe ke tentika maboko na zulu ya beno samu ti mu me kuma kieleka, kieleka ya kulemba. Mpe mu zaba na mwa ntangu fioti, mbote, mu—mu lendaka diaka ve kumona, beno me mona.

²⁶² Ntangu yayi, beno ke kwikila na ntima ya beno ya muvimba. Ntangu yayi beno bambuka moyo, ya kele munu ve. Muntu nionso me zaba yawu. Ya kele Mpeve-Santu. Uh-huh. Ntangu

yayi, kana mu lenda simba kaka mpeve ya kento. Ya kele kima mutindu mosi Yesu salaka. Yandi vwandaka meka na kusimba mpeve ya yandi, Yandi tubaka, “Natina Munu maza ya kunwa.”

Awa kele bakala mpe kento, kaka mutindu ya vwandaka kuna. Ntangu yayi, nge kele ntwenya ya kento, ntwenya mingi kulutila munu. Ntangu yayi, mu banza, mu banza ti kento yayi vwandaka ntwenya kulutila Yesu. Yandi vwandaka pene ya bamvula makumi tatu na tatu; mpe mu banza ti yandi vwandaka ve kasi kumi na nana to makumi zole, kaka ntwenya ya kento. Mpe yandi—yandi—yandi lendaka zaba ve yinki kutuba kasi ntangu Yandi tubaka na yandi Yandi tubaka, “Natina Munu masa ya kunwa.”

Ntangu yayi Tata fidisaka Yandi na Samarie. Yandi vwandaka na nzila ya Yandi na Jéricho, kasi Yandi kwendaka pene-pene ya Samarie; ya kele kuna na zulu ya mongo. Samu na yinki Yandi salaka yawu? Yandi tubaka ti Yandi vwandaka na nsatu ya kuluta kuna. Tata fidisaka Yandi kuna. Mbote, Yandi kwisaka mpe vwandaka, mpe tindaka bilandi na kati ya mbanza samu na kuzwa kima ya kudia. Mpe ntwenya ya kento yayi ya kitoko kwizaka baka maza, mpe Tata zolaka tuba, “Mu ke na kubokila yandi.”

Yandi tubaka, “Kento, natina Munu masa.” Mpe disolo bandaka. Ntangu yayi, kima mosi awa.

Beno me tula diboko ya beno na zulu ya kazaka ya munu? Mosi ya beno? Ve tata. Nzambi na Mazulu zaba ti Kima mosi simbaka munu, ntangu. . . Mu banzaka ti ya vwandaka Billy tubaka na munu na kukwenda. Beno me mona. Mu—mu—maboko ya munu, Nzambi zaba ti ya kele kieleka. Kima mosi simbaka munu mutindu yina mpe mu banzaka ti ya vwandaka Billy tubaka na munu, “Kwenda.” Beno me mona, mu—ntangu beno ke kuma mutindu yayi, na mpasi beno zaba, beno zaba ve ntangu ya kutelama to yinki kusala. Beno me mona? Beno kele kaka na kutala na lweka ya beno mosi. Yinki mu vwandaka zonzila? Kento yina na dibulu ya maza.

Mpe na yina na manima Yandi monaka kisika vwandaka mpasi ya yandi, mpe Yandi tubaka, “Kwenda, baka bakala ya nge.”

Yandi tubaka, “Mu ke na yawu ve.” Mpe Yandi tubaka na yandi, yandi tubaka ti yandi vwandaka na tanu.

Na yina yandi tubaka, “Mu ke mona ti Nge kele profete. Mu zaba ntangu Mesiya ke kwisa, Yandi ke tuba na beto bima yayi.”

Ntangu yayi ya ke vwanda Mesiya mosi bubu yayi, kana mu lendaka tuba na beno kima mosi, kima yina ke tambula mbote ve? Kana Nzambi kusadisa nge ve, nge ke kufwa. Nge ke na cancer. Ntangu yayi, beno ke kwikila ti Nzambi lenda tuba na munu kisika cancer yina kele? Ya kele na kati ya kivumu. Beno ke kwikila ti Nzambi zaba nani beno kele? Nge ke kwikila ti

Nzambi zaba kisika nge me katuka? Nge kele ya Illinois. Nge kele—nge kele nkumbu kele Mama Johnson. Vutuka mpe zinga. Yesu Klisto me belusa nge. Nge ke kwikila na ntima ya nge ya muvimba? Kaka . . . Ti yandi zinga . . . ? . . . Ya kele samu na yina mu tubaka na beno na kuzinga.

Tata na Mazulu, na Nkumbu ya Mfumu Yesu, mu ke tentika maboko ya munu na zulu ya kento ntangu yayi; kupakulama ya Mpeve-Santu kele awa. Belusa yandi, Mfumu, na Nkumbu ya Klisto, Yesu.

Nzambi ya luzolo, na zulu ya mpangi ya beto ya ntalu, yina Nge bumbaka luzingu ya yandi na manima kuna, na Ngonda ya nana, O Nzambi ya mawa, kwiza na yandi ntangu yayi, na yina Mpeve-Santu ke na kupakula bantima ya beto. Mu zaba kumekama ya mpangi ya munu ya bakala. Belusa yandi, Mfumu, mpe belusa yandi . . . ? . . .

Nge vwandaka na mpasi ya ntima, nge kele na diabete; mu zaba ti nge kele na mpasi, ata ti, ya kele . . . ? . . .

Tata ya beto ya Mazulu, muntu yayi kele . . . ? . . . yandi fwana kuzwa Nge to kufwa. Yandi ke zolaka kukwenda na lupitalu . . . ? . . . Lemvokila masumu ya yandi mpe belusa nzutu ya yandi na Nkumbu ya Yesu Klisto ti yandi zinga. Vutuka na yinzo, kwenda.

Mbote mingi, awa, beno nyonso ke baka mpangi yayi ya bakala na yinzo.

Nzambi ya beto ya ntalu, na Nkumbu ya Yesu Klisto, maboko ya munu na zulu ya yandi na yina kupakulama ya Mpeve-Santu me belama. Bika bantu kuzaba yawu. Bika yandi beluka.

Tata Nzambi, mutindu mu ke tentika maboko ya munu (maboko ya munu, nzutu ya munu ya kulunga ve, ya kubeba, ya kubeba mpe ya yimbi; kasi Mpeve-Santu kele na zulu ya munu ntangu yayi), bika ti ngolo yina lenda swasikisa mabanza ya ntima kukeba kento yayi mpe kubelusa nzutu ya yandi, na Nkumbu ya Yesu.

Nzambi ya luzolo, na kuzabaka mpangi ya munu ya bakala mpe nkadulu ya yandi, na kuzabaka ti dibanza yayi ya luvunu . . . [Kisika ya mpamba na bande—Mu.]


O Nzambi, ya ntwenya ya bakala yayi, na kunwanaka bitumba ya mbote ya lukwikilu, ya kutelama na Mvwandulu ya Yehowa-Yile, Munkayulu yina Mfumu pesaka, bika ti ngolo yina vumbulaka Yesu na ntoni, kusimba yandi kaka ntangu yayi. Pesa yandi nsatu ya ntima ya yandi, na Nkumbu ya Yesu Klisto. Amen.

²⁶³ Mfumu Yesu, na zulu ya mpangi ya munu ya kento mu ke tentika maboko ya munu. Na Nkumbu ya Yesu Klisto, bika ti meso yina kubeluka. Bika ti mpasi ya yandi—ya yandi kuzimbana na nzutu ya yandi, na Nkumbu ya Yesu Klisto. Amen.

²⁶⁴ Tata ya beto ya Mazulu, samu na Mpangi ya munu ya kento Kidd, mu ke sambila ti Nge ke nunga na kati ya yandi, mpe pesaka yandi ngolo na nsungi ya yandi ya ntama mutindu Nge salaka Naomi. Mfumu, ti yandi vwanda dyaka ya kusadila samu na nkembo ya Nge. Pesa yawu, Tata, na Nkumbu ya Yesu Klisto.

²⁶⁵ Na yina na Mpangi Kidd, Mfumu, ti lufwa bulaka yandi, kasi Luzingu vutulaka yandi. Nzambi, mu ke sambila ti Nge ke keba yandi na ngolo. Yandi me lutisa ntangu ya yandi nionso. Kasi Nge kele Nzambi, mpe Nge ke sala yayi samu na nkembo ya Nge mutindu Nge silaka munu na lupitalu. Ntangu yayi, pesa yandi ngolo samu na kimbangi. Bika kimbangi ya yandi kuwakana na yinsi ya Ohio, na yinza ya muvimba. [Kisika ya mpamba na bande—Mu.]

Ti Yesu ke belusa munu ntangu yayi.

Mu ke baka Yandi na Ndinga ya Yandi . . . 

60-1002 Tata Mukudi
Branham Tabernacle
Jeffersonville, Indiana U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org